

# Kraiso Jonén Wakmwaek Korop naenámp Ankank Érik Yéńképámp Kar Mekia Akwapnámp Kar

Jisas pok tenánko, 60 a, 65 yopwar niamp arake fek, mao éréképá yarakimp arop Jono apár amor ke Patmos mek kalabusi yak nánko, Kwaro man ninik tokwaeráp yém yéńkép.

Am yém te Kwaro kápae kare ankank wakmwaek korop naenámpan yéńkép námpon. Am ke fek te, Kwarén mér monap arop fárakapao Kristen fákáreran touwe kwatae néńk napantá, am fárakapamp méran kárákáre sánkria, Jono mámá buk kumwi námpon.

Mámá buk fek te wakmwaek korop naenámp ankankan sénámp kápae kare wounáp kar am mek yak námpon. Wounáp kar fi kor te aránon: Jisas Krais te tokwae karara, maomp yae kor fek Kwaro kápae kare yopor arop apárok tirá néria, Satanén kor apárok anámpá pap naenámpon. Tá Jisas am takia pwar nánko, Kwaro koumteouráp arop kárákáre fek foukouri yakápi napan éréképeanánko, wourékam némpouk yae-párak kare yakáp mwanapan sénámpon.

<sup>1</sup> Mámá buk fek yaknámp kar te wokwaek mek wouroumpyekámpan Jisas Kraiso érik farákáp námpono. Kwaro am kar Jisas Kraisén mao náráp tére aropan, ankank koupour érik farákárano

yéńképaeria sánk námpon. Mao Kwaromp tére arop Jon ononampok náráp ensel sámp-kérép nánko, mao te onan am ankank táman yéńképria sénámpon.

<sup>2</sup> Ono am ankank wae nkea nampan am Kwaromp kar Jisas Kraiso yéńkép námp táman érik farákáp nampon. Mámá kar te kare karonó.

<sup>3</sup> Arop mámá Kwaromp ankank wakmwaek korop naenámpan sénámp kar nkea farákáp konap, tá arop mámá profet kar wawi konap, tá arop mámá kumwi tenámpaok i konap, am arop fárákáp ponankoran Kwaro ourour sánk naenámpon. Am te apae riteanápe, am ankank korop naerianámp ke te oukoumwan Kwaro wae séri námpara, mao ankár tak naenámpon.

*Jono fákánek sios mek kar kumwirá néńkámp kar*

<sup>4</sup> Ono Jon ono mámá kar kukumwia provins Esia mekamp fákánek sios mek yakápnap koumteouráp arop, yumonapok tirá kérép rae. Onomp ninik te, Kwar oukoumwan yak námp, tá wokwaek kar yakámp, tá nánkár wakmwaek kor yaká yak naenámp, mao fwap námokuráp ninik fek yumwan ninikia yaewourria yonkwae porokwe néńkanoria nampon. Tá Kwaromp tére mwaria nánapnap fákánek spiritao Kwaromp sia king éntér mwaek yakáp i konap, mao yumwan takanáponoria nampon.

<sup>5</sup> Tá Jisas Kraiso te Kwaromp kar ponankor yae-párák farákáp konámp aropono. Mao te manéńkir sumpwia fárámpea, mao apárokamp king fárákápamp Tokwae Kar yak námpon. Onomp

ninik te am yininkaopwe támao yumwan ninikria yonkwae porokwe nénk mwanapon.

<sup>6</sup> Aeriaka mao nomwan maomp Naropwar Kwaromp pris tére mwanámp káká pwar nánko, Kwar námoku te nomp King yak námpon. Maomp e tokwae, tá kárákáre tokwae te ankár yaká yak konámpono. Am te kareno! ✧

<sup>7</sup> Yumo nkenk! Mao te koumwe mekia ék nánko, arop ponankor fwap mao námokuráp yi kare fek nke mwarea napon. Arop ponankor man oump fek faropap, tá nil fek pukupap, mao kuri nke mwanapon. Tá apárokamp kápae kare fi arop maniap táman ninikia, apae maorianria yonkwae touweria éménka wae mwarea napon. Ye! Am te waeman kare kar tak mwanapon. ✧

<sup>8</sup> Kwar Tokwae Kar kárákáre tokwaerápao arakrá sénámpon: “Ono manénkir kar yak, tá wakmwaek kar yak nampon.” Am Kwar támao oukoumwan yak, wokwaek kar yak, tá nánkár wakmwaek kor yaká yak naenámpon.

### *Jono Kraisen nkenámp kar*

<sup>9</sup> Ono Jon ono te yiráp ankwapnápono. Nomo énéni Jisasomp aropono. Nomo énéni nomwan sápnap touwe sámp konámpon. Nomo énéni Kwaro taokeyak konámp fi mek yakáp námpono. Tá nomo ponankor touwe sámpea kárákáre fek fokopeyakáp i konámpono. Ono Kwaromp kar farákáприя, tá ono Jisasén mér namp farákáp nampono. Aenanko, am fek táman onan fákapea santukupea solwara aokokwampianánko, yaknámpono.

---

✧ **1:6:** Kl 1:17-18; 1 Pi 2:9; 1 Jo 1:7; Yé 4:5; 17:14; 20:6 ✧ **1:7:** Mt 24:30; Jo 19:34,37; Ap 1:11

apár amor ke kánanke Patmos mek páte napo yak nampon.

<sup>10</sup> Jisas Tokwae Karamp yae Sande fek, Yiki Kor Spirit onan oupouroup nánko, am fek táman onomp younkwe mwaek arop kar niamp tékén wumwi nánko maok, am te wur kar niamp. ✨

<sup>11</sup> Aenánko am karao sérrá, “Ponankor ankank amo nke nap te, amo ankár buk fek kumwia fákánek sios mek tirá kérépampo. Amo Efesus mekamp sios mek, tá Smerna mekamp sios mek, tá Pergamum mekamp sios mek, tá Taiataira mekamp sios mek, tá Sardis mekamp sios mek, tá Filadelfia mekamp sios mek, tá Leodisia mekamp sios mek arakrá tirá kérépampo.”

<sup>12</sup> Tak nánko, ono am onan kar sénámp aropan nke naeria sámp-arákár. Ono sámp-arákarea nke nanko, fákánek lam gol tankáp.

<sup>13</sup> Tá ono nke nanko, arop ankárankamp am lam ou mek yak. Am arop te Aropamp Táráp niamp. Mao te waempyam tokwaeri \* yirimp tenánko, pikia pu kor yarápae fek tank nánko, am waempyam fek tapek parák gol † yumuntuk yirimp tenánko yak.

<sup>14</sup> Maomp me pwae te sipsip pwae niamp wupwi ‡ kor kareria, tá koumwe wupwi niamp

---

✨ **1:10:** Jo 20:1,19,26      \* **1:13:** ‘Waempyam tokwaeri’ ran ninik mwanámp te, pris tokwae, tá profet, tá king, arake pourouráp arop tokwaerao yirimp konapan Jisaso kuri takeniamp arop tokwae yak námpan yéńképrá yirimp námpon.      † **1:13:** ‘Gol’ te kingomp e tokwaeran wounáprá Kwaromp waentar kwapweran yéńkép námpon.      ‡ **1:14:** ‘Me pwae wupwi’ te ‘Yak sorokwap kor aropamp me korokamp wupwi pwae niamp’rá sénámpon.

arake. Tá maomp yi te yaomwi yurunk niamp. §

<sup>15</sup> Maomp pu kor te yaomwi tokwae mek yankapramp bras \* waentar niamp. Tá ono maomp kar wa nanko te, ént tokwaerao souroukoup námp niamp.

<sup>16</sup> Mao te fákánek térme yae-párák mwaek tia fákeyak, tá bainat énéńkér mwaek wirápa waenámp maomp táp mek yakámp érik akár koropá yak. Maomp yimetáp te yámarao kárákáre fek tákapa waenámp niampono. ✧

<sup>17</sup> Aenáńko, ono man nkea mao pu páte yak námp fek wonae fik piká párákapea wae arop sumpwi konámp niampi yak. Aenampan maok, mao náráp yae-párák mwaek yae onomp pourouk papria sérrá, “Amo te apápi kwapono. Ono manéńkir kar yakamp, ono wakmwaek kar kor yak nampon.

<sup>18</sup> Tá ono yiki yak konampono. Wokwae ono wae sumpwiampan maok, amo nkeae. Oukoumwan te ono yiki yaká yak nampon. Tá ono sumpwi mwanap ménkiamp ki, tá sumpwi aropamp némpoukamp ki te ono fákeyak nampon.

<sup>19</sup> Aenampara, amo ankár mámá ankank oukoumwan yak námp nke nap, tá wakmwaek korop naenámp ankank nkeria kor kumwiampo.

<sup>20</sup> Amo wae mámá fákánek térme onomp yae-párák mwaek yak nánko nke napono. Tá mámá

---

§ **1:14:** ‘Yi yaomwi yurunk niamp’rá sénámp te, Jisasomp yi te sios mek kápae kare ankank ponankor nkeria, ankákárank aropamp kwatae ninikan kor nkea yopor námpan yéńkép námpon. \* **1:15:** ‘Yaomwi tokwae mek yankapramp bras’ te Kwaro kwatae ninikráp koumteouráp aropan kot naenámp kárákáre tokwaeran yéńkép námpon. ✧ **1:16:** Hi 4:12; Yé 19:15,21

fákánek lam gol nke naponó. Am te kar mek yak námpono. Tá am fi te ará: Am fákánek térme te fákánek siosomp ensel fákáre, tá fákánek lam te am fákánek siosono.”

## 2

### *Efesus mekamp siosnámпок sámp-kérépámp kar*

<sup>1</sup> Am arop warko ankwap kar arakrá sér, “Amo ankár Efesus mekamp sios fákáreramp enselén kar ankwap kumwia sámp-kérépampo. Am kar te ará: ‘Ono te onomp yae-párak mwaek yae te térme fákánek ti-samp yak, tá fákánek lam gol ou mek yáarak i konampao, ono amwan máma kar sámp-kérép rae:

<sup>2</sup> Amo ponankor apae-apaenap ninik, tá waráp tére tokwae nap, tá amo kárakáre fek fokopeyak-nap ninik te am te ono wae méri yak nampon. Tá amo kwatae niniknap aropan warákár mo kare napan kor wae mér nampon. Am arop fárakap amwan arakrá sér, “Yino kuri aposelono.” Aenapan maok, mao te aposel mono. Amo wae am fárakapamp kar youroukoupia am fárakapamp kwekárnap ninik nkea wae mér naponó. ✧

<sup>3</sup> Arop fárakap te amo onomp e sámp-fákeyak napan nkea, am fek amwan touwe kwatae nénk napon. Aenapo amo am táman kokwae mo, am touwe sámpea kárakáre fek fokopeyak konaponó. Am te ono wae mér nampon.

<sup>4</sup> Aeno ono amwan kar arakrá sénae rae: Wokwae amo wourékam mérap ke fek te, amo onan warákár kariapan maok, oukoumwan te mo naponó.

---

✧ 2:2: 1 Jo 4:1; 2 Jo 1:7-11

<sup>5</sup> Wokwaek te amo kwapwe kare ninikiapan maok, oukoumwan te am ninik am pwate naponu. Aenapara, amo ankár wokwaekiap táman warko ninikia, oukoumwan kor kwatae ninik pwararea am kwapwe kare ninik fek akwapampo. Táte amo tak moria kwatae ninik younkwek sir mo napo te, ono amonapok koropea waráp lam warko pwarokwap nanae. ✧

<sup>6</sup> Aeno amo oukoumwan fákeyaknap yae-párak ninik te Nikolasomp firaonap kwatae ninik monoria yopor i konap te, am te kwapwe karenono. Ono kuri monoria yopor i konampono.

<sup>7</sup> Ae konampara, arop waeman woupwirápara, mámara Yiki Kor Spiritao sios fákáreran farákápnámp kar má fwapia wa kuno. Táte arop yorowar kwe-pwarari námp te, ono fwap ‘Takaerá sénanko, arop yiki yak sánk konámp yaoamp ki fwap sámpea fánaenampon. Am yao te yámar mek Kwaromp yopwar mek yak námpon.’ ” ✧

*Smerna mekamp siosén sámp-kérépámp kar*

<sup>8</sup> Tá am arop warko ankwap kar arakrá sér: “Tá amo ankár Smerna mekamp siosomp enselén kar ankwap kumwia sámp-kérépampo. Am kar te ará: ‘Ono manénkir kar yak, tá wakmwaek kar yak namp aropono. Ono wokwaek wae sump-wiampan maok, oukoumwan te yiki yak nampao, ono amwan mámara kar sámp-kérép rae.

<sup>9</sup> Amwan touwe korop námp, tá amo ankank moráp arop yak nap te ono wae mérampon. Aenampampan maok, ono nke namp te, waráp waemp te Kwaromp ankank kápae kareráp námpono.

Amwan Juda ankwap fárákapao wouroump sénap te ono wae mér nampon. Am arop fárákapao sérrá, “Yino te Juda fi mekamp”rá sénapao maok, mao te Juda fi kare mono, Satanomp arop fi kare támaono.

✧

10 Nánkár wakmwaek tae morok yumwan touwe sánk mwanapan maok, yumo táman apápi kwapono. Yumo wawenk! Satano yumwan poupwékápria yumo yiráp méran mokop nap nke nae ritea arop ankwap fárákap tia fápákamánk naerámpon. Aenánko, yumo touwe sámprá tukupea fére-sámpramp yae \* fek mwanapon. Aeno amo ankár Kwarén mér nap kárákáre fek sámpá yakrá akwapea amwan sámp-wouroumpnap ke fek napo kor, fwapono. Ono amwan foporakorria manénkir kámákár akwap námpo sámp konámp ankank niamp yiki yak sánk nanampono. ✧

11 Aenanampara, arop te waeman woupwirápara, ankár Yiki Kor Spiritao sios fákáreran farákápnámp kar mámara fwapia wa kuno. Táte aropao yorowar kwe-pwarari námp te anánk sumpwirao man sámp mo kareno.’ ” ✧

*Pergamum mekamp siosén sámp-kérépámp kar*

12 Tá am arop warko ankwap kar arakrá sér: “Tá amo ankár Pergamum mek yaknámp siosomp en-selén kar ankwapmwaek kumwia sánkampo. Am kar te ará: ‘Ono te bainat tokwaeri énéncér mwaek wiráp kare námp sámp-fákeyak nampao, amwan mámara kar sámp-kérép rae: ✧

---

✧ **2:9:** 2 Ko 11:13-15 \* **2:10:** ‘Fére-sámpramp yae’rá sénámp te, ‘Fae tákáre ke fekia pwar naenámp’rá sénámpon. ✧ **2:10:** Lu 22:31-32; 2 Ti 4:8; Je 1:12; 1 Pi 3:4 ✧ **2:11:** Yé 20:14; 21:8 ✧ **2:12:** Hi 4:12



13 Ono waráp némp te wae mér nampon. Am némpouk Satano king yoroi yak námpono. Aeno amo onont kárakáre fek yakria, waráp mér nap mek wouroump mo i konapono. Wokwaek am arop Antipas onomp kar fárakáp konámp arop mao te amont yakria, onomp karwaok karrá tére nángo, yiráp Satano poukeyak námp am némpouk am fek am arop fárakapao man sámp-wouroumpapono. Aeapan maok, amo am fek onan mér nap pwar moiapono.

14 Aeno ono amwan kar ankwapmwaek sénae rae: Amont arop ankwap fárakap Pergamum mek kwatae profet Balamomp ninikan sámpea kárakáre napon. Am te ará: Mao wokwaek ankwap fi mekamp king Balakén Israel fi mekamp aropan kwekárá kwatae ninik fek tukup mwanap yénk naenámpria yéknépeanángo, am Israel fi ponankor taki napon. Am te ará: Balak Israel firan, kwekár Kwarén ofainap nape fépérria, tá kokopor ninikaok tukupenkrá kwekárimpono. ✧

15 Tá taknámp arop ankwap fárakap amont yakáp nap am fárakap te Nikolasomp firápamp kar sámpea mántwaok paokop napon.

16 Aenapara, amo ankár kwatae ninik younkwek pwarampo. Táte amo tak mo napo te, kánanke kwarok ke fek amonapok koropea ono amont onomp táp mek yaknámp bainat fek yorowar nanae. ✧

17 Aeno arop te waeman woupwirápara, Yiki Kor Spiritao sios fákáreran fárakápnámp kar

---

✧ 2:14: Nam 25:1-9; 31:16    ✧ 2:16: Yé 19:15; 22:12

mámá fwapi wa kuno. Táte arop yorowar kwe-pwarari námp te, ono man yámar mekamp fir ankwapmwaek mek yak námp nénk nanampon. Tá ono man woupwi kor yumwi sánk nanampon. Am yumwi te ono e wourékam am fek kumwi tenanko, arop ankwap am e mér mono. Arop yumwi sámp námp mao saráp mér naenámpon.’ ” ✧

*Taiataira mekamp siosén sámp-kérépámp kar*

<sup>18</sup> Tá am arop warko ankwap kar arakrá sér: “Tá amo ankár Taiataira mekamp siosomp enselén kar ankwap kumwia kérépampo. Am kar te ará: ‘Ono te Kwaromp Táráp, tá onomp yi te yaomwi yurunk niamp, tá onomp pu te bras waentar kwapwe niampao, ono amwan mámá kar sámp-kérép rae: ✧

<sup>19</sup> Amo apae-apae nap ninik ponankor ono wae méri yak nampono. Amo arop fárákan warákarrá, tá amo onan mér, tá amo arop fárákan yaewourrá tére nap te, ono wae mérampono. Tá amo kápae kare touwe sámpea kárakáre fek fokopeyak nap te, ono wae mér nampon. Tá nkwakwe make ninik amo manénkiri nap, am te kwapwe karean maok, oukoumwan nap támao kwapwe kare kareno.

<sup>20</sup> Aeno ono amwan oukoumwan mámá kar sénae rae: Amo mámá yupu Jesebel taki yakanoria pwate napo, amont yak námpono. Am yupu te arakrá sér i konámpon, “Ono te profetono.” Aerá sénámpao maok, mao te onomp tére konap arop fárákan kwekárará, kokopor i konap ninikaok

tukuprá, tá kwekár kwarén ofa sánknáp nape fépér mwanap ninikaokenkria yékn námpono.

<sup>21</sup> Ono te mao kwatae ninik am younkwek pwaranoria ankwap ke yépék nampán maok, mono. Mao te am kokopornámp kwatae ninik te younkwek sir mo námpono.

<sup>22</sup> Aenámpara, wawenk! Ono am yupuan touwe sánk nanampono. Tá am arop fárákap méntér kokoporrá paokop napo kor, am kwatae ninik younkwek sir mo napo te, am fárákan kor touwe tokwae sánk nanampon.

<sup>23</sup> Maomp wakmwaek tukupnap aropan kor tirá wour nanampon. Aenanampara, sios ponankor wae mér mwanapon: Ono te ponankor aropamp ninik mek youroukoup karia fákeyakrá, ono nopok yumwan ankákárankrá aminap puri fek, take pourouráp touwe nénk nanampon.

<sup>24</sup> Aeno ono oukoumwan yumo ankwap fárákap Taiataira mek yakápap koumteouráp arop yumwan sénampono: Yumo am karwaok mo, tá yumo am ‘Satanomp ninik mek kar tukupenk’rá sénap mér mo nap, yumwan ono arakrá sér rae: Taknap arop fárákap yumwan te ono warko ankwap tére am yumuntuk pap mo, fwaponno.

<sup>25</sup> Aeno ponankor ankank yumo ti-samp nap te, ankár sámpá kárákárerá tukupea ono koropnamp ke fek kipo.

<sup>26</sup> Táte arop yorowar kwe-pwar, tá mao onomp ninikaokrá akwapea mao sumpwiria pwarnámp ke fek nángo te, ono man kárákáre sánk nanko, mao fwap arop fi ponankor taokeyak naenámpno.

<sup>27</sup> Tá mao fwap ain yaopwae sámpea am fek

kápae kare arop fi kárákáre fek poukwap námp te, aropao kwar fek yoroinap sospenan porokwapá fouria tiri yui sir konap niamp naenámp. Am tére ono man sánk nanamp te onomp Naropwaro onan koumteouráp arop poukwapaeria sáp námp niampono.

<sup>28</sup> Tá ono man térme Wap Kumur sánk nanampono. ✧

<sup>29</sup> Aeno arop te waeman woupwirápara, ankár Yiki Kor Spiritao sios fákáreran farákápnámp kar má fwapia wa kuno.’ ”

### 3

#### *Sardis mekamp siosén sámp-kérépámp kar*

<sup>1</sup> Tá am arop warko ankwap kar arakrá sér: “Tá amo ankár kar ankwap kumwia Sardis mek yaknámp siosomp enselompór sámp-kérépampo. Am kar te arakono: ‘Ono Kwaromp fákáneek Spirit sámp-fákeyak namp, tá fákáneek térme samp nampao, ono amwan mámá kar má sámp-kérép rae:

Amo apae-apaenap ninik ono wae méri yak nampono. Arop fárákapao amwan arakrá sér, “Mámá sios te fwap yiki yak námpon.” Aerá sénapan maok, mono, amo wae sumpwi yak napono.

<sup>2</sup> Aenapara, amo te ankár amp nap pwarará fárámpae! Waráp kápae kare kwapwe kare ninik te oukoumwan fwap yak nampao maok, wae pwar naeria wae námp am amo ankár kárákáre fek fákeyakampo. Am te apae riteanápe, ono nke nanko, kápae kare amonap ankank te onomp

---

✧ **2:28:** Sng 2:8-9; Yé 22:16

Kwaro nke námp fek ankwap ankárankamp yae-párák kare mono.

<sup>3</sup> Amo wokwaek mámara Kwapwe Kare Kar wawia wae sámpapono. Aenapara, amo ankár táman warko níkia mántwaokria kwatae nínik younkwek pwarampo. Táte amo fárámpria ampi tenap pwarará fárámp moia te, kánánkámp oukun naeria yáraknámp aropao i konámpnámp, ono amonapok korop nanko, amo ono korop naeramp ke mér mo nanape. ✧

<sup>4</sup> Aeno amo te wae arop ankwap yinink oukoumwan Sardis mek yakáp nap maomp waempyam sámpá oumi pap moi naponu. Aenapara, am fárákap te fwap waempyam wupwi kor yiriria onont tukup mwanap pwi naponu. ✧

<sup>5</sup> Táte arop yorowar kwe-pwarari námp te, ono man take pourouráp waempyam wupwi yirimpá papria, maomp e yiki yakáp mwanapamp Buk fek yaknámp te torokor mo, fwaponu. Ono fwap maomp e onomp Naropwaro nke námp fek, tá maomp ensel fákáre nke nap fek érik farákápnámp. ✧

<sup>6</sup> Aeno arop te waeman woupwirápara, mao te ankár mámara kar Yiki Kor Spiritao sios fákáreran farákápnámp kar má fwapia wa kuno.’ ”

*Filadelfia mekamp siosén sámp-kérépámp kar*

<sup>7</sup> Tá am arop warko ankwap kar arakrá sér: “Tá amo ankár kar ankwap kumwia Filadelfia mek yaknámp siosomp enselompór sámp-kérépámpo. Am kar te arakono: ‘Ono yiki kare yakria ono kare kar nínik fi kor kareno. Ono te Devito sámp-yakámp

ki sámp-fákeyak nampono. Ono ménki kikip nanko te, arop ankwap ankárankampao warko ménki kér mono. Tá ono ménki kéri tenanko te, arop ankwap ankárankampao warko kikip mono. Ae konampao ono amwan máamá kar má sámp-kérép rae: ☆

<sup>8</sup> Amo apae-apaenap ninik ono wae méri yak nampon. Aeno amo nkeae! Amo nke nap fek ono ménki kik-pwate nanko yak námp te, arop ankwapao fwap kér naenámp pourou mono. Ono wae mér nampon: Amo te waráp kárakáre oukoumwan kánanke yak námp fek, onomp karwaok akwapria, apae-apae koropánk nánko, amo onan mér nap pwar moi napono.

<sup>9</sup> Amo máamá arop fárákap Satanomp firápao ‘Yino te Juda fi mekamp’rá sénapan maok, mao te Juda fi monap wae mérapono. Aenapan maok, am fárákap te kwekár sérarrá, kwatae ninik fek paokop napono. Aeno amo wawae! Ono am fárákanap sénanko, waráp pu wonae fik me kor woukourria ono amwan warákár kare namp mér mwanapon. ☆

<sup>10</sup> Amo onomp karwaokria amo amwan koropnámp touwe ponankor sámpea kárakáre fek fokopeyak napono. Aenapara, ono fwap amwan taokeyak nanko, am kápaé kare apár mekamp ponankor koumteouráp aropan mokop nap nke naerianámp ankank korop námpao kor, amwan te korop mo fwapon.

<sup>11</sup> Ono amonapok koupour kar korop nanae. Amo sámp-fákeyaknap kwapwe kare ninik te ankár kárakáre fek fákeyakampo. Takria amo nopok sámp

nanap ankank arop ankwap waráp kwapwe kare ninik kwe-pwarará, sámpantáno. ✧

12 Táte arop yorowar kwe-pwarari námp te, onomp Kwaromp Yiki Kor Nap oumpwarani kwapnámp sámp-fokop tenanko, mao te am yiki kor nap pwarará, warko ek akwap mo kareno. Ono fwap man onomp Kwaromp e, tá onomp Kwaromp taun e, maomp pourouk kumwi nanampono. Am némp te Jerusalem wourékam, am te onomp Kwaronámpoknámp yámar mek pwararea ék naenámpo. Onokump wourékam e táman kor maomp pourouk kumwi nanampon. ✧

13 Aeno arop te waeman woupwirápara, Yiki Kor Spiritao sios fákáreran farákápnámp kar máamá fwapi wa kuno.’ ”

*Leodisia mekamp siosén sámp-kérépámp kar*

14 Tá am arop warko ankwap kar arakrá sér: “Tá amo ankár Leodisia mekamp siosomp enselén kar ankwap kumwia sámp-kérépampo. Am kar te ará: ‘Ono te kare kar fi kor yaknamp arop, ono Kwaromp kar ponankor yae-párak kare kare kar farákáp nampono. Ono te Kwaro ponankor ankank yoroinámp fi korao ono amwan máamá kar má sámp-kérép rae: ✧

15 Amo apae-apaenap ninik ponankor te ono wae méri yak nampono. Ono wae mér nampono, amo te námpare mo, amo te touwe fokor mono. Onomp ninik te amo fwap námpare yak nanap, tá amo fwap touwe fokor nanap. ✧

✧ 3:11: Je 1:12    ✧ 3:12: Yé 14:1    ✧ 3:14: Kl 1:15; Yé 19:11

✧ 3:15: Ro 12:11

16 Aenampan maok, amo te touwe fokr kare mo, tá námpare kare mono, amore mek námpare tae morok napon. Aenapantá ono te amwan táp mekamp ak-sinae rampono.

17 Amo te arakrá sér i konapon: “Ono te wae mani tokwae, tá ankank kápae kare tank nampon. Ono te ankank ankwap mo namp yak mono, ponankor fwap pwi nampon.” Aerá sénapao maok, mono. Amo kwatae kare yak napo, arop fárakapao amwan aropomp mwanap pourou námpon. Amo te ankank moráp arop yakria, yi wurumpi yakrá amo pourou mwar waempyam yirimp mo, yak napao maok, amo am te mér mo napon. ✧

18 Aenapantá ono amwan mámá ninik sánk rae: Onomp gol te yaomwi mek yankapea nanko yiki kwapwe námpono. Amo fwap am táman mani fek sámpea amo fwap mani tokwaeráp arop yak nanapon. Tá amo fwap waempyam wupwi mani fek sámpea waráp pourouk oupouroup napo, arop fárakap fwap amo pourou saráp yak nap nke mo napo, amo fwap pwarápae mo nanapon. Tá amo fwap gris marasin mani fek sámpea waráp yi mek papea, fwap nke nanapon. ✧

19 Táte ono ankwap arop fárakapan warákár namp kwamp te, am fárakapamp ninik kwatae fwapokwap naeria am fárakapan yopor i konampono. Ae konampara, amo ankár amoku i konap ankankan ninikia am ankank kwatae te younkwe mwaek sirampo. ✧

20 Amo onan nkeae. Ono ménki fek fokopeyakrá poporokwaprá yak nampon. Táte arop ankwap



onomp kar wuri wawia onan ménki kik-pwar nánko te, ono am mek youmpea am aropént yakria, tá ono méntér fár, tá mao onont fánaenámp. ✧

<sup>21</sup> Táte arop yorowar kwe-pwarari námp te, ono fwap man sénanko, onont onomp sia king fek tank naenámp. Am te wokwaek ono kuri yorowar kwe-pwararea onomp Naropwarént maomp sia king fek tank namp niamp taknámp naenámp. ✧

<sup>22</sup> Ae naenámpara, arop te waeman woupwirápara, Yiki Kor Spiritao sios fákáreran farákápnámp kar má fwapi wa kuno.' ”

## 4

### *Yámar mek Kwarén lotunap kar*

<sup>1</sup> Am kar wae pwar nánko, ono yámar mek nke nanko, ménki ankárankamp kikir akwap nánko, am meknámp arop kar wur fokop námp niamp ono manénkir wawi namp niamp, take fek onan sérrá, “Amo narek mapek aokae! Ono amwan wakmwaek koropánk naenámp ankank yénk nae.”

<sup>2</sup> Aeránko maok, ankár kar Yiki Kor Spirit onomp pourou mek kárákárea wae nánko, ono yámar mek nke nanko, kingomp sia ankárankamp tank. Aenámp arop ankárank am sia fek tank. ✧

<sup>3</sup> Aenámp maomp wae te mani tokwae fek sámp konap yumwi jasper waentar niamp, tá noumouri kor yumwi konilian niamp. Tá am fek fou yimpnámp niamp sia king fek koropea arákari kimpá yak nánko, am te yiki kor yumwi emeral niamp pourouráp nke nampono. ✧

---

✧ **3:20:** Jo 14:23   ✧ **3:21:** Mt 19:28   ✧ **4:2:** Ais 6:1   ✧ **4:3:** Ese 1:28

<sup>4</sup> Tá am fek nke nanko 24 sia am sia king tokwaeran ikir tankáp nánko, arop taokeyakáp konap arop 24 \* sia fek tankáp. Am arop taokeyakáp konap aropamp pourouk te waempyam wupwi yiriria, maomp me korok gol fekamp kump woukouria tankáp.

<sup>5</sup> Am sia king feknámp mékér wae te fápákár akwap nánko, tá maomp pourouk tokwae te oukurér párákapnámp niamp. Am sia wonae fik te fákánek sarom wae yakáp. Am sarom te Kwaromp fákánek spiritan wounáp námpon.

<sup>6</sup> Am sia king wonae fik te ankwap ankank ént solwara tokwae niamp yak. Aenánko, am te glas mek nke napo, koukwe kwapwe konámp niampono.

Tá yiaworaopwe ankank yiki yakáp nap amore mek yakápria am sia king wonae fik ikir yakáp. Am yiaworaopwe ankank yiki yakáp nap kápae kare yi † éntér mwaek, tá younkwe mwaek kuri oupouri yak. ☆

<sup>7</sup> Ankárankamp ankank yiki yak námp te laion niamp. Anánk ankank yiki yak námp te bulmakau touroup niamp. Yinink ankank yiki yak námp te maomp yimetáp te arop niamp. Yiawor ankank yiki yak námp te ant tu tokwaerao narek

---

\* **4:4:** Arop ankwapao arakrá ninik i konapono: 'Arop taokeyakáp konap arop 24' te, ankwap 12 te Jekopomp tárápu éntér-sámpramp mwearoan wounáprá, tá ankwap 12 te éntér-sámpramp aposel fákáreran wounáprá. Takia tapokwapea te 24no. Kwar te arop ponankoramp Kwarono. Saptá 21:12,14 fek yaknámp karan mént nkeae. † **4:6:** 'Kápae kare yi'rá sénámp te, yérékrá yakáprá pwar mo, tá ninik kour tokwae karrápono.

☆ **4:6:** Ese 1:5-10

furukarea yáarak námp niamp. ‡

<sup>8</sup> Am yiworaopwe ankank yiki yakáp nap te am ankákárank námoku te tokwampok yowe pwaerápono. Tá kápae kare yi am fárákapamp pourouk oupoupouri yak námp te pu-pwaek kuri yakáp, tá mek kuri yakáp námpon. Tá yámarao, tá kumuruk kuri am fárákap te arakrá sér i konapono:

“Kwar Tokwae Kar te  
ponankor kárakáre tokwaeráp,  
mao te yiki kare,  
mao te yiki kare,  
mao te yiki kare.

Mao te wokwaek kar yak,  
tá oukoumwan yak námp,  
tá nánkár wakmwaek kor yakea korop  
naenámpon.”

Am fárákapao makrá sénap te anepér mo i konapono. ☆

<sup>9</sup> Am yiki yakápnap ankank te yiki yaká yaknámp Kwaro sia king tokwae fek tank námp táman warákárria man loturia, maomp e narek sampokrá ‘Aesio’rá sér i konapono. Tá kápae kare por am yiworaopwe yiki yakápnap ankank tak nap te,

<sup>10</sup> am 24 arop taokeyakáp konap fárákap támao kor, Kwaro sia king tokwae fek tank nánko, wonae fik pourou méntér éntér mwaeknámp tukupá pér

---

‡ **4:7:** Arop ankwap fárákap arakrá ninik: Kwaro yoroimp ankank ponankor man lotu i konapono: Yao pwaek mekamp fir ou mekamp fir tokwae kwapwe, tá aropao poukwap napo tére konap fir ou mekamp kárakáreráp fir, tá ant ou mekamp koupour kar furukur konámp, tá ankank ponankor taokeyak konámp yonkwae kourráp arop. ☆ **4:8:** Ais 6:2-3

i konapono. Tá am fárákap man lotu nap te, mao yaká yaknámp aroponoria napon. Aeria am fárákap náráp gol fekamp kump sia king tokwae tanknámp wonae fik épéria sérrá, ☆

<sup>11</sup> “Tokwae Kar! Amo yinomp Kwarono.

Amo támao narek karaok yak napo,  
amwan kápae kare aropao warákárria  
waráp e narek sampokria,  
waráp kárákáre ankore mek yakáp mwanap te  
wae pwi kare yak námpon.

Am te apae riteanápe,

Amo ankank ponankor yoroi napon.

Amoku waráp ninik fek yoroia napo,  
am ankank ponankor oukoumwan yak námpon.”

## 5

### *Jono buk ankwap moukoupramp nkenámp kar*

<sup>1</sup> Kwaro sia king fek tankea, maomp yae-párák mwaek yaek buk ankárankamp sámpá tank nánko nke nampono. Am te pu-pwaek, tá éntér mek kuri kumwi tenapo yak námpono. Tá am buk te fákánek éntu torompia fápákamánkia pwate napon.

<sup>2</sup> Tá ono nke nanko, kárákáre kor ensel ankwap tékén arakrá wumwi, “Kwapwe kare arop te wa mámá buk fekamp torompi tenap éntu má kwaráp naenámp fwap pwi námpon?”

<sup>3</sup> Yámar mek kuri tak naenámp arop ankwap yak mo, apárok kuri yak mo. Kwar ankore mek kuri am buk aokoroepa am buk mek nke naenámp te yak mo kareno.

---

☆ **4:10:** Dan 6:26

<sup>4</sup> Ono nke nanko, arop fárákap te am buk fwap aokorop-pwar naenámp arop nke mo mwanap pourou námpantá, ono táman yonkwae touweria éma wae nampono.

<sup>5</sup> Aenángo arop taokeyak konámp arop ankárankao onan arakrá sér, “Amo émi kwaponó. Amo nkeae! Juda fi meknámp laion korop námp te, mao king Devitomp arák fekamp taonono. Mao te waeman yopor aropan yorowaria kwe-pwarará apárok anámpá pap námpara, mao fwap am buk fek éntu fákánek ke fek torompiramp kwaráprá fupukuraerá akwap naenámpo.”

*Jono Sipsip Morok nkenámp kar*

<sup>6</sup> Aerámpan maok, ono nke nanko, Sipsip Morok ankárank fokopeyak nánko, am te wokwaek faropea napo, sumpwi námp niamp pourouráp. Mao te sia king fek tank nánko, am fek am yiworaopwe ankank yiki yakáp nap, tá arop taokeyakáp konap aropamp sia man ikarea napo, am kuk mek tank. Aenángo, am te souwe fákánek aokránkirámp, tá fákánek yi. Am yi te Kwaromp fákánek spiritono. Kwaro am fákánek spirit te ponankor apár mekmwaek tirá kérép námpono. ✧

<sup>7</sup> Am Sipsip Morok te mao akwapea Kwaromp yae-párak mwaek yaekamp buk am sámp.

<sup>8</sup> Mao wae am buk sámpeanángo maok, am ankank yiki yakáp nap, tá 24 arop taokeyakáp konap arop, am fárákap Sipsip Morokamp wonae fik pourou méntér éntér mwaeknámp tukupá pér. Am fárákap ankákárank námoku gita niamp sámp, tá dis gol ankárankamp am mek paura nánákáre

yankap konap top-pwarámpá yak námpráp sámp.  
Am te Kwarén koumteouráp aropao kar toropwap  
i konap wounápono. ✧

<sup>9</sup> Tá am fárákap takria maok, tár wourékam  
arakrá sámp:

“Amo fwap fákánek ke éntu torompiramp buk  
sámpea,

am kwaráp nanap pwi kar naponno.

Am te apae riteanápe,

wokwaek arop fárákapao

amwan faropea sumpwi pap napo,

waráp yiri fek amo arop fárákapan

yamokwapea Kwarén sánk naponno.

Ye! Amo te ponankor arop fi,

tá ponankor karráp,

ponankor apár mekamp,

tá nkwakwe make pourouráp ponankor makia,

máte amo warko yamokwap naponno. ✧

<sup>10</sup> Amo takia napo,

am fárákap yinomp Kwaromp

pris fákáre yakáp napo,

mao am fárákapamp King yak námpon.

Tá am fárákap te king yakápria,

apárokamp koumteouráp arop fárákapan

poukwap mwanapon.” ✧

*Sipsip Morokamp e narek sampoknap kar*

<sup>11</sup> Tá ono warko tokoreyakria, kápae kare  
enselomp kar wawi namponno. Am fárákapan  
te kouroump mwanap pourou mono, kápae  
kare fopwakwap-fopwakwapono. Am fárákapao

✧ 5:8: Sng 141:2; Yé 8:3-4; 15:2

✧ 5:9: Sng 98:1

✧ 5:10: Ais

61:6; 1 Pi 2:5,9; Yé 20:6; 22:5

kingomp sia, tá am ankank yiki yakápnáp ankank,  
 tá arop taokeyakáp nap aropan kor ikiri yakápria  
 maok, ✧

<sup>12</sup> am fárákapao tékén arakrá wumwi:

“Mámá te Sipsip Morok wokwae faropea sumpwi  
 papapoño.

Mao te waeman e tokwae,  
 tá ponankor kwapwe kare ankank,  
 kwapwe kare yonkwae koukour,  
 tá kárákáre tokwae kar sámp naenámp te,  
 waeman pwi kare yak námpono.

Kápaé kare arop maomp e narek sampokria  
 man warákarrá ‘Aesio’rá sér mwanap te,  
 waeman pwi kari yak námpon!”

<sup>13</sup> Tá ono kápaé kare nkwakwe make ankank  
 Kwaro yoroi námpp yámar mek yak namp, tá apárok  
 yak námpp, tá némp mek yak námpp, tá solwara mek  
 yak námpp, maomp kar wawi nampono. Ye! Po-  
 nankor ankank ponankor mekmwaekamp yakáp  
 nap, ono wa nanko, am fárákapao arakrá sér:

“Am arop te náráp sia king fek tank nánko,

tá Sipsip Morokao kuri am yawor  
 fwap kápaé kare ‘Aesio’rá sénap kar,

tá e tokwae sánknáp,

tá warákár,

tá kárákáre am te waeman

fwap kápaé kare por

sámp saráp yaká yak nenepón.”

<sup>14</sup> Tá am yiworaopwe yiki yakápnáp ankank  
 támao sérrá, “Am te kare tak mwanapon.” Tá  
 arop taokeyakáp konap fárákapao maomp wonae  
 fik tukupá pérrá man lotu napon.

## 6

*Sipsip Morokao buk fekamp éntu kwarápnámp kar*

<sup>1</sup> Tá ono nke nanko, Sipsip Morok mao am buk éntu fek fákánek ke torompi tari nap ankáránkamp ke kwarokwap. Aenángo, am fek ono wa nanko yiaworaopwe ankank yiki yakápnap am ou mekamp ankwap ankáránkampao kar sénánko, maomp kar te oukuréao párákapnámp niampria mao sérrá, “Amo koropae!” ✧

<sup>2</sup> Aerá sénánko ono nke nanko, wupwi kor hos, tá am fek arop tankria pir sámpá tank. Aenángo, yorowar kwe-pwar konap kump man sánk napo, yorowar kwe-pwarará akwapria mao am yorowar kwe-pwarnámp tére oukoumwan térea waerá akwap námpon.

<sup>3</sup> Tá Sipsip Morok buk fek éntu niamp torompi tenap anánk ke fekamp kwarokwap nánko, am fek ono wa nanko, anánk ankank yiki yak námp mao sérrá, “Amo koropae!”

<sup>4</sup> Tá am meknámp hos ankwap korop. Am te noumouri kor. Am fek tanknámp aropan kárákáre sánk napo, mao fwap apárokamp koumteouráp aropamp kwapwe kare ke tirá épéri pwar nánko, am fárákap fwap arop ankwap fárákapan tirá wour mwanapon. Aeria man bainat tokwae kar am tére naenámp sánk napono.

<sup>5</sup> Tá Sipsip Morok buk fekamp éntu niamp torompinap yinínkan kwarokwap nánko, am ke fek ono wa nanko, yiaworaopwe ankank yiki yakápnap yinínkao sérrá, “Amo koropae!”



Aeránko, ono hos yákáre kor \* nke nampono. Am fek te arop fírámp kápae purump konap skel yaek samp-tank.

<sup>6</sup> Tá ono wa nanko, yiaworaopwe ankank yiki yakáp nap meknámp arop kar niamp ankwap arakrá sér, “Amo sospen kánanke mek wit ankárankamp yámar fek térea sámp konámp mani fek purumprá yokwapá papae! Tá amo yininkaopwe sospen kánanke mek bali ankárankamp yámar fek térea sámp konámp mani fek purumprá yokwapá papae. Aeno amo wel ntia wain souroumpouri kwapono.”

<sup>7</sup> Tá Sipsip Morok buk fekamp yiawor éntu kwar-pwar nánko, am ke fek yiaworaopwe ankank yiki yakáp nap mekamp yiaworaó sérrá, “Amo koropae!”

<sup>8</sup> Aeránko ono nke nanko, pourou yar faokor akwapnámp hos ankwap am meknámp korop. Aenánko, am fek arop tank. Maomp e te Sumpwi. Tá arop ankwap maomp e te Yaomwi mek Pik mwanap maomp wakmwaek tank. Am anánkaopwean takenkria kárákáre sánk napo, mao koumteouráp arop ponankor yiawor mwaekamp ankárank mwaekamp kirikiri ponankor tirá wour nenepón. Tá am anánkaopwerao tirá wour nenep te bainat fek, tá yae-porokwe tokwae fek, tá nkwakwe make touwe fek, tá apárokamp yao pwae mekamp nape fírao, arake fek tirá wour nenepón. ✧

---

\* **6:5:** ‘Yákáre kor hos’ te nánkár wakmwaek pwar naenámp yae fek nánko, yae-porokwe tokwae korop naenámpan yéńkép námpon.

✧ **6:8:** Ese 14:21

<sup>9</sup> Tá Sipsip Morok buk fekamp éntik éntu kwar-pwar nánko, ono nke nanko, waemp fákáre alta ankore mek yakáp. Am arop fárákap te wokwaek Kwaromp kar sámpea kárákáreria arop ankwap fárákan am kar farákápapo, táman yoporap arop fárákapao tirá wouriap aropono. ✧

<sup>10</sup> Am waemp fákáre tékén arakrá wumwi, “Kárákáre Tokwaeráp Tokwae Kar e! Amo yiki karenó! Waráp ninik te ponankor kare karonó! Apaekamp ke akwapea pwate nánko, amo apárok yakápnap arop fárákan kotria yinan tirá wouri nap fek am fárákan nopok érou nanapono?” ✧

<sup>11</sup> Aenapo Kwaro am fárákan waempyam wupwi tokwaeri moumountukri nénkria mao am fárákan arakrá sér, “Yumo ankár kánámpár anepér tae morokenke. Nánkár am yopor aropao yumont ankárakamp tére konap yiráp ankwapyaenáp arop fárákan kor takrá tirá wouranápono. Nánkár am kouroumprá akwapea pwi nánko, Kwaro fwap am fárákan nopok érou naenámpón.” ✧

<sup>12</sup> Tá Sipsip Morok éntu niamp buk fekamp fákap tenap tokwaman kwarokwap nánko, ono nke nánko, némp yérur tokwae koropria apár ponankor oupouroup. Tá yámar te arákarea yam turupwi nokore niamp araknámp nánko, yunk te ponankor noumouri koria maok, yiri niampi akwap. ✧

<sup>13</sup> Yámar mekamp térme te ponankor apárok mukaria ékrink námp te yao fik kirao oukoumwan

---

✧ 6:9: Jo 16:2   ✧ 6:10: Yé 16:5-7   ✧ 6:11: Yé 3:4-5; 7:9,13-14

✧ 6:12: Mt 24:19

noumouri mo námpan ouwiraó nánko, némpouk ponankor ékrink i konámp niamp.

<sup>14</sup> Yámar me tokwaerao kor kwanpae moukoupá pap konap niamp rá akwap te. Tá faonkwe, ént mekamp apár amor ke fárákapao kor am yakáp i konap pwarará érérekéri tukup.

<sup>15</sup> Tá apárokamp king fárákap ntia e tokwaeráp arop fárákap, tá soldia fákáreamp kepten fárákap, tá mani tokwaeráp arop fárákap, tá kárákare kor arop, tá kápae kare arop kwaporok tére konap, tá kápae kare arop fwap párák yakáp i konap, am fárákap énéńki ponankor pírikimpea apár mekmwaek, tá kounk fi mekmwaek wouri yakáp.

✧

<sup>16</sup> Tá am fárákapao kápae kare faonkwe tokwae, tá péri wi aran wumwirá, “Yumo ankár yinomp pourouk mapek koropá péria Kwaro sia king fek tankrá nke naenámp fek, tá Sipsip Morokamp yonkwae pwarámp korop naenámp fek yinan oupoupourenke.

<sup>17</sup> Am te apae riteanápe, am Yae Tokwae fek te am anánkaopwerao arop fárákap kwatae niniki nap fek nopok touwe kwatae néńk nenep yonkwae pwarámp te wae korop námpon. Aenámpara wa fwap am kwe-pwararea yak naenámpon?”

## 7

*Kwaromp firáp yakápnap arop fárákan taok káknámp kar*

<sup>1</sup> Ono am yém niamp nkea pwarará, ankwap yém nke nanko ensel yiaworaopwe apár mek

yiawor woupwi mwaek foukouri yakáp. Am fárakap te apárokamp yiawor mwaekamp apár mwaekamp ouwipár sámp-fákeyakáp napo, ouwipár apár mek korop naenámp pourou mo, solwara mwaek kuri korop naenámp pourou mo, yao yowe mek kuri korop naenámp pourou mo.

<sup>2</sup> Tá ono nke nanko, ankwap ensel yámar aok konámp mwaeknámp yámar meaok korop. Mao te yiki yak konámp Kwaromp taok pap konámp sámpea am yiaworaopwe ensel Kwaro apár ntia solwara souroumpouri siranáponoria kárakáre sánknámp ensel táman kárakáre fek tékén wumwi.

<sup>3</sup> Aeria mao arakrá sér, “Yumo te apár ntia solwara, tá yao aráte koupour souroumpouri kwaponó. Nánkár yino Kwaromp tére aropamp yépe kor fek maomp taok kákea pwar nángo maok, wakmwaek yumo am ankank fwap souroumpour mwanaponó.” ☆

<sup>4</sup> Tá ono wa nanko, koumteouráp arop fárakapan Kwaromp taok kákrámp kouroump napan ‘Arakae’rá sér, “Mao 144,000 ankákárank Israel fi mekamp ponankor koumteouráp aropan Kwaromp taok káká pwar.”

<sup>5</sup> Aenapo maok, Judamp fekamp 12,000 taok sámp, ta Rubenomp fekamp 12,000, tá Gatomp fekamp 12,000,

<sup>6</sup> tá Aseromp fekamp 12,000, Naptalaimp fekamp 12,000, tá Manasamp fekamp 12,000,

<sup>7</sup> tá Simionomp fekamp 12,000, tá Livaimp fekamp 12,000, tá Isakaromp fekamp 12,000,

<sup>8</sup> Sebulunomp fekamp 12,000, tá Josepomp

---

☆ 7:3: Ese 9:4; Yé 9:4

fekamp 12,000, tá Bensaminomp fekamp 12,000. Mámá arop fákáre mao Kwaromp taok sámp naponó.

*Kápae kare arop ou tokwae Kwarén lotunap kar*

<sup>9</sup> Ono am ankank ponankor nkea pwarará, ono warko tokoreyakria nke nanko, kápae kare koumteouráp arop fárákap koupoukour yakáp napo, am arop fárákap te kouroumpea pwi mwanap pourou mono. Am koumteouráp arop fárákap te nkwakwe make pourou yipiráp, tá kápae kare arop fi ponankor, tá ponankor apár mekamp, tá ponankor moumountukri karráp, am fárákap sia king wonae fik, tá Sipsip Morok nke námp fek fokouri yakáp. Am fárákap te wupwi kor waempyam tokwaeri yiriria, tá oupuk pwae yaek tia, ✧

<sup>10</sup> arakrá tékén wumwi, “Nomp Kwar sia king fek tank námp, tá Sipsip Morok am yaworao nomwan warko éréképea nepo, nomo oukoumwan yae-párak yakáp námpono.”

<sup>11</sup> Tá ensel fákáre ponankor, tá arop taokeyakápnap arop fákáre ntia yiworaopwe ankank yiki yakáp nap, am fárákap sia king ikarea yakáp. Tá am fárákap sia king wonae fik pourou méntér éntér mwaeknámp tukupá péria Kwarén lotu.

<sup>12</sup> Aeria arakrá sér,  
 “Kare karonó,  
 nomo nomp Kwarén warákára wae mwaro.  
 Aeria nomo maomp e tokwae érik sér mwaro.  
 Mao te ponankor kwapwe kare ninikrápara,  
 nomo man fáparákrá maomp e narek sampok mwaro.

---

✧ 7:9: Yé 5:9

Mao te kárakáre karenó.  
 Ye! Ponankor kárakáre tokwae te  
 maomp pourouk yak námpono.  
 Mámá ponankor ankank te maomp sarápono.  
 Kare karonó.”

*Am fárakapao touwe sámnpap ke wae pwarnámp  
 kar*

<sup>13</sup> Tá taokeyak konámp arop ankwapao onan sérrá, “Mámá wupwi kor waempyam tokwaeri yirirnap arop fárakap máte wanon? Tá am fárakap te maoknámp korop napon?” ✧

<sup>14</sup> Tá ono nopok man sérrá, “Tokwae Kar e! Amoku támao amo mér napon.” Tá mao onan sérrá, “Mámá arop fárakap te wokwaek touwe tokwae yopor aropao néńkapo, tia yakápiap arop fárakapono. Am fárakapamp waempyam te Sipsip Morokamp yiri fek yáraria napo, maomp waempyam wupwi kwapwe námpono. ✧

<sup>15</sup> Aenapara, am fárakap Kwaromp sia king wonae fik fokouri yakáp napon. Tá yámaraok, tá kumuruk kuri maomp Yiki Kor Nap mek maomp tére tére konapono. Tá Kwar am sia king fek tank konámp, mao námoku am fárakapént yakria taokeyak naenámpono. ✧

<sup>16</sup> Aenánko am fárakap te mwae touwe mo, éntantá níkip mo mwanapono. Am fárakapan yámar touwe fokor mo, tá ankwap ankank man pourou touwe fokor mo naenámpon.

<sup>17</sup> Am te apae riteanápe, Sipsip Morok sia king amore mek yakria am fárakapan sipsip taokeyak konámp aropnámp taokeyak námpono. Mao te

fwap am fárákap éréképea ént oukurnámp fik akwap nánko, am fárákap yiki yak sánk konámp ént fár mwanapono. Tá am fárákapamp yi mekamp émti Kwaro torokor nánko, am fárákap warko éménk mono.” ☆

## 8

*Sipsip Morokao buk fekamp fákánek éntu kwar-pwarnámp kar*

<sup>1</sup> Tá Sipsip Morok buk fekamp fákánek tompnámp éntu kwar-pwar nánko, am ke fek te pourounk kánanke yak mo, tá yámar mek kar sérar mo, akwapea hap aua fek.

<sup>2</sup> Aenángo, wakmwaek ono nke nanko, ensel fákánek Kwaromp wonae fik foukouri yakáprá fákánek wur tia fákeyakáp.

<sup>3</sup> Tá ensel ankwap koropea alta wonae fik fokopeyak. Mao te gol fekamp dis am mek paura nánákáre souri pokanoria yankap konap yaek sámp-fákeyak. Aenángo man kápae kare paura nánákáre nénk. Am enselo am tia, kápae kare Kwaromp firáp aropamp kar toropwap i konap koupoukarea mént tapokwapea Kwarén ofa i konap golráp alta fek paprá Kwarén sánk. Am alta te Kwaromp sia king wonae fik yak námpon.

<sup>4</sup> Tá am yaomwi souri paura nánákáre yankap nap, ntia Kwaromp koumteouráp aropamp Kwarén kar toropwap i konap, am ponankor enselomp yaek pwarará narek pokea Kwaromp nás mek. ☆

<sup>5</sup> Aenáńko ensel paura nánákáre yankap konap dis am sámpea alta fekamp yaomwi am dis mek top-pwarámpea am yaomwi sámprá apárok sir. Mao apárok sirarrá pwaránko oukurér tokwae párákapria pourounk tokwae nánko, mékér wae fáparákár akwap nánko, apár némp yérur tokwae.

*Ensel yiaworaopwerao wur fukurnap kar*

<sup>6</sup> Tá am fákáneń ensel fákáneń wur kor tia yakáprá wae wur fokour mwaria nánap.

<sup>7</sup> Tá ensel ankárankamp mao náráp wur fokop nánko maok, warákam ais, tá yaomwi ntia yirirént tapokwapea apárok kwarokor pik. Aenáńko, ponankor apár yinink mwaekamp ankwap ankárank mwaek kirikiri mwaekamp apár, tá am mwaekamp yao ponankor, tá yiki kor apwar pwaeran kor ponankor yaomwirao fári pwar. ✧

<sup>8</sup> Tá ensel anánkao náráp wur fokop nánko, faonkwe tokwae fek yaomwi yurunknám niamp sinapo, solwara mek piká párákap. Am solwara te yinink mwaek fékerrá oumwi kákea pwate napo, ankwap ankárankamp mwaek te yiri arákarrá yak.

<sup>9</sup> Aenáńko am solwara mek yiki yakápnám ankank yinink mwaek pir-pwara nap am te ankárankamp mwaek fi te ponankor surumpwi pwar. Tá sip yinink mwaek pirékarea pwaranap, ankárank mwaek ponankor tokopá akwap. ✧

<sup>10</sup> Tá ensel yininkao náráp wur fokop nánko maok, térme tokwae ankárankamp yaomwi kare saromnám yurunkia am yámar mek pwararea apárok piká párákap. Ént yinink mwaek pir-pwarará oumwi kák tenap am térme ankárankamp



mwaek ént oukurnámp mek, tá ént kar mek piká párákap.

<sup>11</sup> Am térmeamp e te Top i konámp Marasin. Am ént yinink mwaek pirékarea pwenap ankárankamp mwaek te, am ént wae top kwatae kare. Aenánko kápae kare arop am ént fánapo, am fárákapamp yare mek topa wae nánko, am fek surumpwi naponu.

<sup>12</sup> Tá ensel yiaworao náráp wur fokop nánko, yámar ntia yunk, tá térme ponankor yinink mwaekamp ankárank mwaek ponankor souroumpouri yakáp napo, wae yokor konap am táman kor yinink mwaek pirékarea napo, ankárank mwaek kirikiri wae yokor konámp akwapea kirikip. Aenánko, yámar ntia kumur ankárankamp mwaek kirikiri te wae yokor mono.

<sup>13</sup> Tá ono nke nanko, tu tokwae ankárankamp yámar mek amorik furukarea akwap. Ta ono wa nanko, mao tékén arakrá wumwi, “Koupoutáráp nap, koupoutáráp nap, koupoutáráp nape, apárokamp kumteouráp arop koupoutáráp nape! Am te apae riteanápe, ankwap yininkaopwe ensel mao náráp wur fokour mwarea nap te, touwe tokwae kumteouráp arop fárákan korop naenámon.” ✧

## 9

### *Ensel éntirao wur fokopnámp kar*

<sup>1</sup> Ensel éntirao náráp wur fokop nánko maok, ono nke nanko, térme ankárankamp yámar mek pwarará, apárok piká párákap. Aenánko, Kwaro

---

✧ **8:13:** Yé 9:12; 11:14

man am apár me tokwaeri fi tikipnám yak monám ménki kikip naenám ki sánk.

<sup>2</sup> Am térmeao am me kik-pwaránko, am me meknám yaomwi tokwae yanknap souri niamp aok. Aeria am souri te yámar ntia ouwipáran oupouroup nánko, yámar ntia ouwipár akwapea kirikip.

<sup>3</sup> Aenánko, kápae kare tákár oumpwe niamp am yaomwi souri meknám apárok pikrink. Tá am fárakapao sámpnap kárakáre te kaoamp touwe sánk konám kárakáre niampria, am te arop yamp nánko touwe tokwae naenám ankankono. ✧

<sup>4</sup> Tá am fárakapan kar arakrá sér, “Yumo te apwar pwae, tá apárokamp nkwakwe make ankank némpouk forokor konám, tá yao ankwap aráte kwatae pap kwapono, mono. Yumo ankár am arop fárakap Kwaro náráponoria yépe kor fek taok paprá kumwi nám yak monám aropan sámpá kwatae pap kipo. ✧

<sup>5</sup> Yumo am arop fárakapan touwe sánk nap te akwapea éntik yunk napao maok, am arop fárakapan te tirá wouri kwapono.” Tá am arop touwe kwatae nénknám kao niamp am támao arop yourounkwe nánko, touwe tokwae naenámpon.

<sup>6</sup> Am taknám ke fek arop wae sumpwi mwaria mwae kup oupourounk napao maok, am sumpwi mwanap mwae kup te nke mono. Ye, arop sumpwi mwar kar napao maok, sumpwi te am fárakapan sámp mono.

<sup>7</sup> Ono nke nanko, am tákár fákáre te hos fákáreráo yorowarrá tukup mwaria nánap nap niampono.

Am ankank fárákapamp me korok te gol fekamp kump niamp woukouri yakáp. Tá am fárákapamp yimetáp te arop yimetáp niamp.

<sup>8</sup> Tá am fárákapamp me pwae te koumteouramp me pwae éréri niamp pourouráp. Tá am fárákapamp yu kor te laionomp yu kor niamp.

<sup>9</sup> Am fárákapamp éntér kor fek te kapa fekamp kárae yiriria yakáp. Tá maomp yowe pwae énk te yorowar mek tukup mwanap kápae kare hosráp karisamp ounk niampono.

<sup>10</sup> Am fárákapamp kore te kao kore kor niampria, aropan touwe sámp naenámp marasin am meknámp sánk konámp kore kor wiráp yak námpon. Tá am fárákapamp kore kor te arop touwe sánkrá akwapea éntik yunk fek naenámp kárákáre samp naponö.

<sup>11</sup> Am fárákap te waeman taokeyak naenámp king yak námpon. Am king te apár me éri fi tikipnámp yak mo, ankár piknámpamp enselono. Am ensel te Híbru kar fek maomp e ‘Abadon’ ri konaponno. Tá nomp Grik kar fekamp e fi te ‘Kápae kare ankank kwataerá kák naenámp aropono’.

<sup>12</sup> Má manénkir koropnámp touwe tokwae kwatae te wae pwar námpon. Wakmwaek korop naenámp touwe tokwae oukoumwan anánkaopwe yak námpon. ✧

### *Ensel tokwamao wur fokopnámp kar*

<sup>13</sup> Tá ensel tokwamao náráp wur fokop nánko, ono wa nanko, Kwaromp wonae fik yaknámp alta gol fek yiawor woupwi meknámp kar sér.

14 Mao am wur fákeyaknám ensel tokwaman arakrá sér, “Am ensel yiworaopwe ént Yufretis mwaek fákápá yakáp nap amwar pwar napo tuku-panápono.”

15 Aeránko maok, mao wae am yiworaopwe ensel pwar nánko, wae am fárákapao ponankor koumteouráp arop yinink mwaekamp pírékara nap ankárank mwaek kirikiri ponankor paoki pwar naenámpon. Am ensel fárákap te am tere mwanámpria am ke korop naenám am yae, tá am yunk, tá am korop naenám yopwar táman yépékrá nánapi yakáp napon. ✧

16 Tá soldia fákáre hos fek tankáp nap te 200 milion. Ono am kouroumpea sénapo, wawi nampono.

17 Tá ono yém niamp arakria hos fákáre am fek arop tankáp nap nke. Am arop fárákapao yiririna kárae fek yaknám te noumouri kor, tá muru kor, tá yar kor. Am hosamp me kor te laionomp me kor niamp arake, tá yaomwi yurunk ntia souri, tá yumwi salfa fekamp yaomwi maomp táp meknám koroprá fápákár akwap.

18 Am fárákapao koumteouráp arop ponankor yinink mwaek pírékarea pwar napan ankárank mwaek te mámá yininkaopwe ankank kwatae fek paoki pwar napon. Am mámá yaomwi, tá souri, tá salfa yumwi fek yaomwi yurunk nám, hosamp táp meknám korop nám, am fek paoki pwar napon.

19 Am hos fákáreamp touwe sánk naenám kárakáre te táp mek yak, tá maomp kore kor fek yak námpon. Maomp kore kor te tákam niamp me korrápao am me kor fek táman aropan touwe

---

✧ 9:15: Yé 8:7-12

sánk konámpon.

<sup>20</sup> Arop ankwapmwaek ponankor oukoumwan am yaomwi ntia souri ntia yumwi salfa fekamp yaomwi fek sumpwi mo nap te, kwatae ninik younkwek sir mono. Am námokuráp yae fek yoroia man lotu mwanap ankankan pwar mono. Tá kare! Am fárákap te kwatae spirit fárákapan, tá kwekár kwar mao námoku gol, silva, tá bras, tá yumwi, tá yao am fek yoroinap ankank nke naenámp pourou mo, kar wa mo, yárák mo, mak i konámp táman lotu napon. ✧

<sup>21</sup> Am arop fárákap arop ankwap fárákap tirá wourrá, foupourá, kokoporrá, oukunrá, mak i konapan maok, am pwarará kwatae ninikan kor younkwe mwaek sir mo napon.

## 10

### *Jono enselo buk sánk nánko fárinámp kar*

<sup>1</sup> Ono am ankank nkea pwarará, ono warko nke nanko, ensel kárakáre kor ankwap yámar meknámp ék. Maomp pourouk te koumwerao oupouroupa yak nánko, fou yimpnámp yépe kor fek kámpá yak. Maomp yimetáp te yámar wae niamp, tá maomp pu kor te oumpwar fokopeyak nánko, ponankor yaomwi yurunk aowarámp námp niamp.

<sup>2</sup> Mao buk kánanke ankárankamp yaek fákeyak nánko, am buk fupukurae yak. Mao te yae-párak mwaek pu solwara yumuntuk pumpur, tá yae-mánkwan mwaek pu apár kar fek pumpuri yak námpono.

---

✧ 9:20: Sng 135:15-17; Yé 16:9,11

<sup>3</sup> Maomp wumwi kar kárakáre te laionomp kar tokwae niampono. Mao arakrá wumwi nánko, fákánek oukurér párákaprá nopok kar sérar.

<sup>4</sup> Am fákánek párákapnám্প oukurér kar sérar napo, ono koupour am kumwi naeria nampán maok, ono wa nanko, yámar meknám্প kar ankwap onan sérrá, “Am fákánek párákapnám্প oukuréramp kar am te amo ankár waráp ninik mek fákapea papae. Amo kumwi kwapono.”

<sup>5</sup> Tá am ensel ono wokwaek nke nanko, solwara yumuntuk, tá apár kar fek fokopeyak nám্প, mao yámar mek náráp yae-párák mwaeek yae kamsampok.

<sup>6</sup> Aeria mao narek yiki yaká yak konám্প Kwaromp e fek fou e sér. Am Kwar te yámar me ntia am mek yakápnám্প ankank ponankor, tá apár ntia am mek yakápnám্প ankank, tá solwara ntia am mek yakápnám্প ankank ponankor yororoimp Kwarono. Am enselo arakrá sér, “Pwar naenám্প ke wae korop námpono. Kwar te warko yépék naenám্প pourou mono.

<sup>7</sup> Warko wakmwaeek ensel fákánerao wur fokop nánko, am wur kar korop nánko, am ke fek am ankank Kwaro nanampria wokwaek sérimp kar te mek yakámpan mao wae tére nánko, érik korop naenámpon. Am kar mao náráp tére konap profet fákárean wokwaek kar sérimp támaono.”

<sup>8</sup> Tá am aropamp kar manénkir wawi namp, warko yámar meknám্প koropria onan arakrá sér: “Amo akwapea ankwapmwaeek pu solwara mek, tá ankwapmwaeek pu apár kar fekia fokopeyaknám্প enselomp yaek fupukurae yaknám্প buk sámpae.”

<sup>9</sup> Aeránko, ono akwapea enselonámpokria ono man sérrá, “Amo onan támá buk kánanke sápaé.” Tá mao onan sérrá, “Amo sámpea fárae. Am te fária napo, waráp yare mek te yorowar naenámpan maok, waráp táp mek te hani nape kwapwe niamp naenámpón.”

<sup>10</sup> Mao takrá séri pwar nánko, ono am buk kánanke enselomp yaekamp sámpea, ono fár. Tá onomp táp mek hani nape kwapwe niamp námpao maok, ono fári pwate nanko, onomp yare mek te yorowara wae.

<sup>11</sup> Tá Kwaro onan sérrá, “Amo kápaé kare apár mekamp arop firan, tá kápaé kare pourou yipiráp aropan, tá kápaé kare karráp aropan, tá kápaé kare king fákáreran korop naenámp ankank má profet kar warko farákápaé.”

## 11

### *Arop anánkaopwerao kar farákáp nep kar*

<sup>1</sup> Ono am fek purump konap yaopwae mear yaopwae niamp sáприя onan sérrá, “Amo fárámprá Kwaromp Yiki Kor Nap ntia alta purumpae! Tá amo am mek lotu i konap koumteouráp arop kouroumpae!

<sup>2</sup> Aeno amo yár Yiki Kor Nap pu-pwaeak yak námp te purump kwaponó. Amo ankár pwarampo. Am yár te ankwap fi aropampono. Nánkár am fárákapao koropea am Yiki Kor Némp pumpuri yakáprá tukupea 42 yunk fek mwanaponó. ✧

---

✧ 11:2: Lu 21:24; Yé 13:5

<sup>3</sup> Aenapo, ono mámá arop anánkaopwe sámp-kérép nanko, onomp kar farákáp nenepono. Am arop yawor te yonkwae touweria yirimp konap waempyam yirimpea onomp kar farákáprá akwapea 1,260 yae \* fek nenepon.

<sup>4</sup> Am anánkaopwe te yao oliv † yawor niamp, tá lam anánkaopwe apár ponankoramp Tokwae Karamp wonae fik yak nepon. ✧

<sup>5</sup> Táte arop ankwap fárákap am arop yaworan sámpá yampourou mwaria napo te, am arop yaworamp táp meknámp yaomwi koropria am arop yaworan yopornap arop fárákapan wouroukoumpi pwar naenámpo.

<sup>6</sup> Am arop yawor Kwaromp kar farákáp nenep ke fek te, waeman yámar mek warákam ékantá kér nenep kárákáre yak námpon. Tá am arop yawor te ént ponankor yiri arákarrá kák nepo, am támao apárokamp koumteouráp aropan nkwakwe make kwatae ankank fek kwatae pap nenepon. Kápae kare ke fek am arop yawor tak neria te, fwap tak nenep kárákáre yak námpon.

<sup>7</sup> Am arop yawor Kwaromp kar farákápnep tére wae pwar nepo, yao pwae mekamp fir am fi tikip monámp apár me éri meknámp narek aokea am arop yaworént yorowar. Yorowaria am arop yaworan kwe-pwararea faoporia kák nánko, sumpwi nenepon. ✧

<sup>8</sup> Aetenánko, am arop yaworamp yákáre te taun tokwae kar mek akwapnámp mwae kupuk tank

---

\* **11:3:** 1,260 yae te 42 yunk, tá yinink yopwaria yiawor amore mekan sénámpon. † **11:4:** 'Yao oliv' te kantri Israel firan wounáp námpon. ✧ **11:4:** Sek 4:11,14 ✧ **11:7:** Yé 13:1



nenepon. Am ‘Taun’rá sénap te mek wounáprá ‘Sodom’ tá ‘Isip’rá sénapon. Am taun tokwae mek táman wokwaek am arop yaworamp Tokwae Karan yaopwae porokopramp fek faropá papa-pono.

<sup>9</sup> Arop ankwap fárákap ponankor apár mekamp, tá ponankor arop fi, tá ponankor karráp, tá nkwakwe make pourou yipiráp ponankor, makia am arop yaworan, fwaprá kar sumpwi neponoria am yákáre nkerá tukupea yinink yae akwapea yiawor yámar kuk námp fek mwanapon. Tá arop fárákap am arop yaworamp yákáre ‘Apár me mek pap kwapono’rá sér mwanapon.

<sup>10</sup> Tá apárokamp koumteouráp arop am arop yawor sumpwi nep táman warákáránkrá tár sámprá fir fépérrá nouroup arop fárákan ankan nénk. Am te apae riteanápe, am profet yawor apárok yakápnep koumteouráp aropan ponankor touwe nénk konepantá mwanapon.

<sup>11</sup> Yinink kumuria yiawor yámar kuknámp yae fek táman Kwaro yiki yak naenámp néker am arop yaworamp yákáre mek sámp-kérép nánko, am arop yawor fárámpea fokopeyak. Aenepo, arop fárákap am arop yaworan nkea apáp tirinka wae.

<sup>12</sup> Tá am arop yaworao wa nepo, kar ankwap yámar meknámp tékén am arop yaworan arakrá wumwi, “Yumo narek mapek aokenke!” Aeránko maok, am arop yawor kouwme mekia yámar mek pok nepo, am arop yaworan yopornep arop fárákap mao pok nep wae nke. ✧

<sup>13</sup> Tá am ke fek táman némp yérur tokwae korop nánko, am taun ankáránk mwaek kirikiri kwatae

---

✧ 11:12: 2 Kin 2:11

akwap nánko, sarakok mwaek oukoumwan fwap yak. Tá 7,000 koumteouráp arop am némp yérur fek tapek ponankor surumpwi. Tá ankwap koumteouráp arop fárákap fwap yakáp nap apáp tirínka waeria, yámar mekamp Kwaromp e sámpá sakap.

<sup>14</sup> Anánkaopwe touwe tokwae kwatae korop námp wae pwarane. Aeno koupoutáráp nap, wawenk! Yininkan korop naenámp touwe tokwae te wae wonae fik kar námpon. ✧

*Ensel fákánerao wur fokopnámp kar*

<sup>15</sup> Tá ensel fákánerao náráp wur fokop nánko, ono wa nanko, yámar meknámp kar ankwap tékén arakrá wumwi: “Nomp Tokwae Kar ntia maomp Kraiss am anánkaopwe te apár-apár ponankoramp Kingono. Tá mao ankár King yaká yak naerámpon. ✧

<sup>16</sup> Tá am 24 arop taokeyakáp i konap arop Kwaro nke námp fek sia fek tankáp i konap, am fárákap Kwaromp wonae fik apárok tukupá pérrá Kwarén lotu. ✧

<sup>17</sup> Am fárákapao sérrá,  
 “Tokwae Kar, amo Ponankor Kárakáreráp  
 Kwarono!  
 Amo oukoumwan yak nap,  
 wokwae kar amo yakap,  
 amo wae waráp kárakáre tokwae sámpea,  
 amo King yak naponu.

Aenapantá yino amwan ‘Aesio’rá séreano.

<sup>18</sup> Ankwap fi arop, waráp kar wa te monoria yonkwae pwarámp napan maok,

✧ **11:14:** Yé 9:12 ✧ **11:15:** Dan 7:13-14; 1 Ko 15:24-25; Yé 19:6

✧ **11:16:** Yé 4:4,9-10

nopok waráp yonkwae pwarámp te wokwae korop námpon.

Oukoumwan má ke fek te, sumpwinap arop kot mwanapono.

Oukoumwan má ke fek te, nopok kwapwe kare ankank waráp tére aropan nénk nanap keno.

Am te profet fákáre,

tá waráp koumteouráp arop fárákap ponankor amwan apápria,

waráp yae ankore mek yakáp i konap,

eráp arop fárákap,

e moráp arop fárákapan kor

ponankor mént nopok nénk nanapono.

Oukoumwan te apár kwatae pap

konap arop fárákapan

kwatae pap nanap kenono.” ✧

<sup>19</sup> Am taokeyakáp konap arop fárákap takrá séri pwar napo, yámar mek yaknámp Kwaromp Yiki Kor Nap ménki kik-pwar napo, Kwaromp kontrak tanknámp bokis am Yiki Kor Nap mek tank konámp érik tank. Aenánko, mékér wae fápárakár akwap nánko, pourounkria oukurér párákap nánko, apár némp yururria kápae kare aisráp warákam ék námpon.

## 12

### *Yupu ntia wunépir wounápnámp kar*

<sup>1</sup> Tá yámar mek wunéri tokwae ankwap korop námp te arake: Yupu \* ankárankamp yakria, yámar

---

✧ **11:18:** 2 Ko 5:10; Yé 1:8; 20:11-13    \* **12:1:** ‘Yupu’rá sénámp te, Israel firan sénámpon.

te mao náráp pourouk waempyamnámp yirímp. Tá yunk maomp pu ankore mek yak. Tá kump mek éntér-sámpramp térme yak námp maomp me korok woukwap.

<sup>2</sup> Mao te táráp † yakria, táráp fárákap naenámp touwe tokwae sámpría tékén apánka wae.

<sup>3</sup> Aenángo, ankwap wunéri yámar mek korop. Am wunéri te ará: Wunépir niamp ankwap yak. Am te noumouri korao maok, fákánek me kor, tá fére-sámpramp souwe aokránkirámp, tá kump fákánek kingao woukour i konámp niamp am fákánek me korok yakáp.

<sup>4</sup> Maomp kore kor fek ankáránk mwaek kiríkiri térme yámar mekamp yaokwampia apárok épér. Aenángo, anánk mwaek kiríkirikámp térme mwar yámar mek yak. Tá am wunépir yupu-táráp sámp naerianámp, maomp wonae fik yakria am yupu-táráp sámpeanánko, man am táráp sámp-nonkorop nanampria yépékrá yak.

<sup>5</sup> Tá yupu poumou-táráp sámp. Am táráp te nánkár téképá yakria wakmwaek koumteouráp arop fárákap ponankor kárakáre fek poukeyak naenámp ain yaopwae sámp naenámp. Am yupu wae táráp sámpeanánko, koupour kar am táráp sámpea narek pokea Kwaronámpok maomp sia king fek sámpá tukup.

<sup>6</sup> Aenapo, tá am yupu farákapea kwar saráp mek akwap. Ampok te wae Kwaro maompor némp nánapi pwate nánko, man ampok taokeyakápria man fir nénkrá tukupea 1,260 yae fek mwanapon.

---

† 12:2: 'Táráp'rá sénámp te, Jisaso Israel fi mek ékianámpan warko yámar mek pokea Kwaromp sia king fek tank námpán sénámp.

<sup>7</sup> Oukoumwan te yámar mek yorowar tokwae korop nánko, Maikel ntia maomp ensel fákáre wunépirént yorowar. Tá am wunépir ntia maomp ensel fákáre nopok kor yorowaria maok, ✧

<sup>8</sup> mao te yorowar kwe-pwar mwanap kárakáre te yak mono. Aenapara, am fárakap te warko yámar mek yakáp mwanap pourou mono.

<sup>9</sup> Tá Kwaromp ensel fákáre am wunépir apárok far-sinapon. Mao te am wokwaek kar yakámp tákam Satan, ponankor aropan kot i konámp arop, tá ponankor koumteouráp aropan poupwekáp i konámp aropono. Man apárok far-sirarrá maomp ensel fákáreran kor méntér fárarámprá épér napon. ✧

<sup>10</sup> Tá ono wa nanko, yámar meknámp tékén arakrá wumwi: “Oukoumwan te nomp Kwaro nomwan wae warko érékép námpono. Maomp kárakáre wae érik korop nánko, mao King yak námpono. Tá maomp Kraiss wae kárakáre tokwae sámp námpono. Am te apae riteanápe, am nomp ankwapyaenáp fákáreran kot i konámp arop nomp Kwaro nke námp fek wae fek, tá kumuruk, am fárakapan kot i konámpan maok, oukoumwan te wae ensel fákárerao apárok far-sinapono. ✧

<sup>11</sup> Nomp ankwapyaenáp fákáre wae Sipsip Morokamp yiri fek kárakáre sámpea, maomp kar kare farákápria amnap ninik fek yopor aropan yorowar kwe-pwararea yérépea pwar napono. Am fárakap te apárok kwapwe kare yakáp mwaria ninik mono. Numwar yopor aropao tirá wouranáponoria yénképá yakápi napono.

✧ **12:7:** Ju 9   ✧ **12:9:** Stt 3:1; Yé 20:2-3   ✧ **12:10:** Jop 1:9-11; Sek 3:1

12 Aenapara, yámar me amo, tá yumo ponankor yámar mek yakáp nap, yumo te warákár kipo! Aeno amo apár, tá amo solwara yumo mér kipo! Yumwan touwe tokwae kwatae korop naeane. Satan te wae yumonapok pik tenámpono. Mao te náráp ke wae fae tákáre nánko, táman mér námp kwamp, yonkwae pwarámp tokwae námpon.”

13 Am wunépir te nke nánko, námwan apárok far-sinapantá, akwapá am poumou-táráp sámpnám yupu táman yérépe.

14 Tak námpantá maok, am yupu furukarea náráp némpouk kwar saráp mek farákap akwapea am wunépir panek yak nánko, fwap yakanoria, tu tokwaeramp yowe pwae yawor nénk. Tá am ampok man taokeyakáprá fir nénkrá tukupea, yinink yopwaria yawor táman amore mek.

15 Tá am wunépir táp meknám ént ayam nánko, am ént tokwae am yupuamp wakmwaek kwarákarrá akwap. Am wunépiramp ninik te éntao akwapea am yupu sámp nánko, yupu sumpwianoria.

16 Aenámpan maok, kwarao am yupuan yae-wouria kwar mek tákár pik nánko, ént am mek piká pwar.

17 Tá am wunépir te am yupuan yonkwae pwarámpea yáreakia maomp ankwap tárápuan † yorowar naeria. Am koumteouráp arop fárákap te Kwaromp ponankor loaok tukupria Jisaso farákápnám kar kárákáre fek sámp-fákeyakápnap arop fárákaponu. ☆

---

† 12:17: ‘Tárápu’rá sénám te Jisasomp wakmwaek tukupnap arop fárákapan sénámpon. ☆ 12:17: 1 Pi 5:8

18 Tá am wunépir te solwara woupwi mek fokopeyak námpan.

## 13

*Yao pwae mekamp fir anánkaopwe koropnep kar*

<sup>1</sup> Tá ono nke nanko, yao pwae mekamp fir solwara \* meknámp korop. Mao te souwe fére-sámpramp, tá fákánek me korráp. Am souwi fek fére-sámpramp kump kingao woukwap konámp am fek woukouri yak. Tá maomp me kor fek te e ankwap yakáp. Am e fi te 'Kwarén nkwakwe make wouroump séri konap' enono. ☆

<sup>2</sup> Am yao pwae mekamp fir oukoumwan ono nke nanko te, lepat niamp, tá maomp pu kor te beamp pu kor niamp. Tá maomp top kor te laionomp top kor niamp. Tá am wunépirao náráp kárákáre am yao pwae mekamp firan sánk námpono. Man mao námoku niamp king yakanoria papria, man kárákáre tokwae sánk námpon.

<sup>3</sup> Am yao pwae mekamp firamp me kor ankwap te wae yankopea sumpwi pap nap niamp pourouráp. Aenámpao maok, maomp me kor fekamp ankáráp te wae aoporea warko fwap námpon. Tá arop ponankor am yao pwae mekamp firan kokorokoria maomp wakmwaek tukup napon.

<sup>4</sup> Am wunépirao náráp kárákáre yao pwae mekamp firan sánk námpara, arop ponankor am méria wunépiran lotu napon. Tá am yao pwae mekamp firan kor loturia arakrá sér, "Wa mámara

---

\* **13:1:** 'Solwara'rá sénámp te, arop fi ponankoran wounáp námpon. ☆ **13:1:** Yé 17:3,7,12

yao pwae mekamp fir niamp make pourouráp yak námpon? Wa fwap méntér yorowar naenámp pwi námpon?”

<sup>5</sup> Tá Kwaro am yao pwae mekamp firao numwar takanoria pwate nángo, mao kara waerá Kwarén wouroump kar sénámpon. Tá mao wae take pourouráp térerá akwapea 42 yunk fek naenámp.

<sup>6</sup> Mao náráp top kor kununkarrá Kwarén wouroump-séria, Kwaromp e fek, tá Kwaromp némpouk, tá Kwaromp firáp yámar mek yakáp nap man kor wouroump-sénámpon.

<sup>7</sup> Kwaro ‘Mao numwar takano’ ria pwate nángo, mao Kwaromp koumteouráp aropént yorowaria kwe-pwararea am fárákan apárok tirá nér námpon. Tá mao fwap kárákáre sámpea ponankor arop fi, ponankor apár mekamp, tá ponankor karráp, tá ponankor pourou yipiráp arop makia ponankor aropan poukwap naenámp. ☆

<sup>8</sup> Apárokamp ponankor koumteouráp arop, am fárákapamp e yiki yak sámp mwanap aropamp eráp buk fek wokwaek Kwaro apár yoro mo námpek kumwi moimp, am fárákap yao pwae mekamp firan lotu napon. Am buk te wokwaek sámp-wouroumpap Sipsip Morokamp bukono. ☆

<sup>9</sup> “Arop te waeman woupwirápara, mao ankár mómá kar fwapi wa kuno.

<sup>10</sup> Táte Kwaro ankwapan fákapá yakano-rianánko te, ankár akwapea fákapá yak naenámp. Táte Kwaro arop ankwap bainat fek sumpwianorianánko te, mao ankár bainat



fek sumpwi naenámpón. Táte am take pourouráp ankank korop nánko te, Kwaromp kourouráp arop ankár kárakáre fek Kwarén mér nap sámp-fákeyakáp kip.” ✧

<sup>11</sup> Tá ono nke nanko, yao pwaé mekamp fir ankwap, kwar meknámp narek aok. Mao te sipsip morokamp souwe anánkaopwe niamp pourouráp, tá maomp kar te wunépiramp kar niamp pourouráp.

<sup>12</sup> Am wakmwaekamp yao pwaé mekamp fir te manénkirkamp yao pwaé mekamp firamp kárakáre sámpea, am kárakáre fek manénkirkamp yao pwaé mekamp firao nke námp fek tére námpon. Mao te kourouráp aropan kárakáre fek poukeyakrá fopwaoka wae nánko, apár ntia kourouráp arop fárakap am mek yakáp nap, am manénkirkamp yao pwaé mekamp firan lotu napon. Man te wokwaek sumpwi pap mwaria porokwapnap ankáráp kwatae wae aopore tenámpon.

<sup>13</sup> Wakmwaekamp yao pwaé mekamp fir te nkwakwe make kárakáre yéknép námpon. Ankwap pourouráp kárakáre te ará: Kourouráp aropao nke nap fek mao nánko, yaomwi yámar meknámp apárok éká párákap.

<sup>14</sup> Kwar te numwar manénkirkamp yao pwaé mekamp fir nke námp fek, nkwakwe make kárakáre yéknéria amnámp ankank támao némpoukamp kourouráp aropan yankar sérarano ritea yépekrá yak. Mao kourouráp aropan arakrá sér, “Yumo ankár yao pwaé

mekamp firamp wunéri yorororá maomp e narek kakap mwanapono.” Am yao pwae mekamp fir wokwaek bainat fek porokwapá pap napan maok, mao oukoumwan yiki yak námpon. ✧

15 Tá Kwaro numwar takanorianánko, mao am wunérian yiki yak naenámp nékér sánk nánko, am wunéri kar sér. Táte arop ankwap fárákap man lotu mo napo te, mao sénánko, tirá wour mwanapono.

16 Tá wakmwaekamp yao pwae mekamp firao sérrá, “Wuri nke mwanap ankank yae-párak mwaek yae, tá ponankor aropamp yépe kor fek taok paprá kukumwirá párapakopria, e kánankeráp arop fárákap, ntia e tokwaeráp yakápnap arop fárákap ntia mani tokwaeráp arop ntia ankank moráp arop fárákap, tá párák yakápnap arop fárákap ntia slev térenap arop fárákap man kor kukumwirá párapakop kipo.”

17 Aenámpara, táte yao pwae mekamp firamp e, tá maomp e fi kouroump námp am aropamp pourouk yak mo nánko te, mao arop ankwapan ankank mani fek sámp mo, tá arop fárákapao maonámp ankank mani fek sámp mono. ✧

18 Nomo ankár táman fwapi ninik mwaro. Arop wae mér námp kwamp te, yao pwae mekamp firamp e fi kouroumpea kumwi tenámp fwapia mér kuno. Am kouroump námp te arop ankwapamp enono. Am aropamp eramp fi ponankor tapokwap námp te 666.

## 14

*144,000 arop fárákap tár wourékam sámpnap kar*

<sup>1</sup> Ono warko nke nanko, Sipsip Morok Saion faonkwek fokopeyak nánko, 144,000 koumteouráp arop fárákap méntér fokouri yakáp. Aenapo, am fárákapamp yépe kor fek Kwaro Sipsip Morokamp e, tá maomp Naropwaromp e makia kukumwia pwatenámp yakáp. ☆

<sup>2</sup> Tá ono wa nanko, yámar meknámp ounk korop nánko, am te ént souroukoup tokwaenámp niamp, tá oukuréao párákap námp niamp. Am ounk te aropao gita porokwapnap ounk niamp. ☆

<sup>3</sup> Am fárákapao Kwaromp sia king wonae fik, tá yiworaopwe ankank yiki yakáp nap, tá arop taokeyakáp konap fárákapao nke nap fek tár wourékam ankwap sámp. Am 144,000 koumteouráp arop te wae Kwaro apárokamp koumteouráp arop ou mekamp warko yamokwap námp, am fárákap támao saráp am tár kar fwap mér mwanapono. Tá arop ankwap am tár kar mér mwanap pourou mono. ☆

<sup>4</sup> Am arop fárákap te koumteou fárákapént kwatae ninik moi napono. Am fárákap yiki kare yakápi napono. Apae-apae némpouk Sipsip Morok akwap naerianánko te, am arop fárákap maonámpaok tukup konapono. Kwaro wae am arop fárákan apárokamp koumteouráp arop ou mekamp warko yamokwapeanánko, am fárákap te nae-tárápu niamp Kwaro námoku náráponoria Sipsip Moroként warko yamokwapeanánko yakáp napon. ☆

<sup>5</sup> Am fárákap te kwekár sér moi nap, tá kwatae ankanki nap yak mono.

*Ensel yininkaopwerao kar sénap kar*

<sup>6</sup> Tá ono nke nanko, ensel ankwap yámar mek furukarea akwap. Mao te yaká yak konámp Kwapwe Kare Kar samp námpao, am Kwapwe Kare Kar apárokamp koumteouráp aropan farákáp. Mao am kar farákáp námp te ponankor pourou yipiráp, ponankor arop firan, tá ponankor karrápan, tá ponankor apár mekamp aropan farákáp námpono.

<sup>7</sup> Mao tékén arakrá sér, “Kwaro ponankor aropan youroukouprá kot naenámp ke te wae korop námpono. Aenámpara, yumo te ankár man apápria maomp e narek sampok kipo. Yumo ankár yámar me ntia apár, tá solwara, tá ént oukurnámp ponankor yoroinámp Kwarén lotu kipo.”

<sup>8</sup> Ensel ankwap manénkirkamp enselén éntér paprá korop. Am wakmwaek koropnámp enselo sérrá, “Némp tokwae Babilon te wae kwatae akwap námpon. Ye, am te wae kwatae akwap námpon. Am némp Babilon támao ponankor koumteouráp aropan nánko, maomp kárakáre kor kokopor ninikaok tukup naponno. Am tak námp te mao kárakáre kor wain ént nénk nánko, am fárakapao fánap niampon. ✧

<sup>9</sup> Tá ensel ankwap am anánkaopweramp wakmwaek korop. Am yinink ensel támao tékén arakrá wumwi, “Táte arop ankwap yao pwae mekamp fir ntia maomp wunériran loturia, maomp taok paprá kumwi námp maomp yépe kor fek, tá maomp yaek sámp námp te,

<sup>10</sup> mao te Kwaromp yonkwae pwarámpnámp wain ént ankwap fánaenámp. Kwar te am

wain ént ént karént tapokwapea pap moi námpon. Mao te náráp yonkwae pwarámpnám kap mek kwarákárria am arop fárákan nopok nénk nánko, ankár fár mwanapon. Tá am arop fárákap, yiki kor ensel fárákap nke nap fek, tá Sipsip Morokao kor nke nám p fek yumwi salfa fek yurunknám yaomwi mek touwe kwatae sámp mwanapon. ✧

<sup>11</sup> Tá am yaomwi meknám aoknám sourirao am fárákan touwe sánkria am te narek pok saráp yaká yak naenámpon. Am arop fárákap am yao pwae mekamp fir ntia maomp wunériran loturá, tá maomp e fekamp kumwi sámprá, mak i konap arop fárákap te anepér mono. Wae fek, tá kumuruk ankár touwe sámpá yakáp mwanapon.”

<sup>12</sup> Táte take pourouráp ankank korop nánko te, Kwaromp kouramp arop fárákap te ankár kárakáre fek fokopeyakáp mwanapon. Am kouramp arop fárákap te Kwaromp loak tukupria Jisasén mér nap kárakáre fek sámpá yakáp mwanapon. ✧

<sup>13</sup> Tá ono wa nanko, yámar meknám kar ékria arakrá sér, “Amo kar arakrá kumwiae: Kouramp arop fárákap oukouramp, tá wakmwaek, Tokwae Karamp tére térerá tukupria am meknám sumpwi nap te, am fárákap fwap warákár mwanapon.” Yiki Kor Spiritao kor sérrá, “Ye! Am fárákapao tére tokwae nap fek te fwap anepér sámp mwanapon. Am fárákap te kwaporok tukup mono. Kwapwe kare niniki nap te am fárákapént yak nánko Kwaronámpok tukup napon.” ✧

✧ **14:10:** Yé 13:11-17; 19:20; 20:10,15; 21:8 ✧ **14:12:** Yé 13:10

✧ **14:13:** Hi 4:10

*Kwaromp yonkwae pwarámp apárok ék naenámp kar*

<sup>14</sup> Ono warko nke nanko, koumwe wupwi kor yak nánko, am mek arop ankárank tank námpao maok, maomp pourou te Aropamp Táráp niamp. Maomp me korok te gol fekamp kump woukwapá yakria, mao asmaok wiráp kare yaek fákeyak. ✧

<sup>15</sup> Tá ankwap ensel Yiki Kor Nap meknámp ek korop. Mao am koumwe mek tanknámp aropan tékén arakrá wumwi: “Amo waráp asmaok fek fir fékérae! Apárokamp fir ponankor wae noumouri námpono. Aenámpara, oukoumwan má ke fek te fir tére mwanap kenono.”

<sup>16</sup> Aeránko am koumwe mek tanknámp aropao náráp asmaok fákeyakrá apárokamp fir wae yápa námp am kar féké.

<sup>17</sup> Tá ankwap ensel yámar mek yak námp Yiki Kor Nap meknámp ek korop. Mao kuri asmaok wiráp kare yaek samp.

<sup>18</sup> Tá yaomwi poukwapnámp kárakáre sampnámp ensel ankwap alta pwarará korop. Mao asmaok wiráp kare sampnámp enselén tékén wumwiria sérrá, “Amo am waráp asmaok wiráp kare fek ponankor apár mekamp wain ki fékéria ankwap fek koupoukourae. Maomp ki te wae ponankor noumouri námpono.” ✧

<sup>19</sup> Aeránko maok, am enselo náráp asmaok sámp-fákeyakrá wain ki fékéria koupoukour. Tá am wain ki yumwi fekamp tang tokwae mek pumpurékamprá fákap mwaria am mek tirá épér. Am te Kwaromp yonkwae pwarámpono. ✧

20 Tá ensel fárákapao am tang taun tokwae younkwe mwaek yak námp mek wain ke pumpurékamprá ént fápámp. Aenapo, am yiri tang younkwe mwaek kwarákárria fopweanápi akwapea 300 kilomita fek, tá narek pokea hos top kor fek yaknámp ain fek yak.

## 15

*Fákánek enselo fákánek ankank kwatae fákeyakápnap kar*

<sup>1</sup> Tá wunéri tokwae ankwap yámar mek korop nánko, ono nkea am táman nínik tokwae. Ono am nke namp te ará: Fákánek ensel fákáre arop kwatae pap mwanap fákánek ankank kwatae ti-fákeyakáp. Táte nánkár am ankank kwatae pwar nánko te, wakmwaek ankwap korop mono. Am fákánek ankank kwatae fek waeman Kwaromp yonkwae pwarámp wae pwar námpon. ✧

<sup>2</sup> Tá ankwap ankank solwara tokwae niamp nke. Am te yaomwi yurunkao glas mek yak nánko, nke nap niamp. Tá ono nke nanko, arop fárákap am yao pwae mekamp fir ntia maomp wunérian yorowaria kwe-pwarará, tá am yao pwae mekamp fir, maomp e fi kouroumprá kumwi nap apárok sámp-anámpapono. Am fárákap glas niamp solwara fik foukouri yakáp napo, Kwaro warákárria am fárákapan gita nénká pwate nánko, tá am fárákapao tia yakáp.

<sup>3</sup> Aeria am fárákapao Kwaromp tére arop Moses ntia Sipsip Morokamp tár sámp. Am tár te ará:

---

✧ 15:1: Yé 15:6-7

“Tokwae Kar, amo ponankor kárakáre tokwaeráp  
Kwarono.

Ponankor tére amo tére nap te tokwae kar nánko,  
yino nkea ninik tokwae námpon.

Amo ponankor arop firamp King,

tá waráp ninik am te ponankor yae-párakria kare  
karono. ✧

<sup>4</sup>Tokwae Kar e!

Amo ankárankampao saráp amo yiki kare yak  
napon.

Aenapara, arop ponankor amwan apápria,  
waráp e narek sampok mwanapon.

Ponankor arop fi koroepa amwan lotu  
mwanapon.

Am te apae riteanápe,

waráp yae-párak kare ninik te wae érik korop  
námpon.”

<sup>5</sup> Am pwar nánko, ono warko nke nanko, yámar  
mek yaknám Yiki Kor Nap yak. Am yaknám Nap  
Aokore Yiki Kor Kare ménki kikir akwap. ✧

<sup>6</sup> Tá am fákánek ensel fákánek ankank kwatae  
arop kwatae pap mwanámpria nap sámp-fákeyakáp  
nap, am Yiki Kor Nap pwararea ek mank. Am  
fárakap te waempyam kwapwe kare yinka waeria  
waentar kwapwe nám kápéria, tá mao parák gol  
par-sorowaria yakáp.

<sup>7</sup> Tá yiworaopwe ankank yiki yakápnap ou  
mekamp ankwap ankárank, mao fákánek dis gol  
fákánek enselén nénk. Tá ankár yiki yaká yaknám  
Kwaromp yonkwae pwarámp, am te am fákánek  
dis mek top-pwarámpá yak námpon.

---

✧ 15:3: Lo 32:3-4; Yé 16:7 ✧ 15:5: Hi 9:3



<sup>8</sup> Tá Kwaromp kárákáre ntia maomp waer-amp souri Yiki Kor Nap mek top-pwarámpá yak. Tá arop ankwap am Yiki Kor Nap mek yoump naenámp pourou mono, nánkár am fákánek enselo fákánek ankank kwatae térea pwaranápono.

## 16

*Fákánek dis mek Kwaromp yonkwae pwarámp yaknámp kar*

<sup>1</sup> Tá Yiki Kor Nap meknámp kar ankwap korop nánko, ono wa. Mao arakrá tékén am fákánek ensel táman wumwiria sérrá, “Yumo ankár tukupea am fákánek dis Kwaromp yonkwae pwarámp am mek yak námp tirá apárok kokorarenke!” ✧

<sup>2</sup> Aeránko, ensel ankárankao akwapea náráp dis sámprá apárok kwarákár. Aenánko, nkwakwe make kárákáre kor ankáráp kwatae kare yao pwae mekamp fir ntia maomp wunériran lotu i konap taok papnámp kumwi yaknámp aropamp pourouk koropánk. ✧

<sup>3</sup> Tá ensel anánkao náráp dis solwara mek kwarákár. Tá solwara sumpwi aropamp pouroukamp yiri niampi akwap nánko, solwara mek yakápnap ankank ponankor surumpwi pwar. ✧

<sup>4</sup> Tá yinink enselo náráp dis ént tokwae mek, tá ént oukurnámp mek kwarákár nánko, am ponankor yiri niampi akwap.

<sup>5</sup> Tá ono wa nanko, am ént taokeyaknámp enselo sérrá,  
“Amo oukoumwan yak nap,

✧ **16:1:** Sef 3:8; Yé 16:17   ✧ **16:2:** Kis 9:10; Yé 13:11-17   ✧ **16:3:** Kis 7:17-21

tá wokwaek kar amo yakapono.

Amo yiki kareno.

Waráp kot te waeman pwi kare yak námpon.

<sup>6</sup> Am arop fárákap te

waráp koumteouráp arop fárákapan,

tá profet fákáreran tirá wour napo,

am fárákapamp yiri kwarákari námpono.

Aenapan, amo am kwatae arop fárákapan

am yiri nénk napo,

mao fár mwanapono.

Am fárákap te waeman nopok kwatae ankank  
sámp napon.” ✧

<sup>7</sup> Tá ono wa nánko, alta fek yaknám্প ensel arakrá  
wumwi:

“Kare! Tokwae Kar,

amo te Ponankor Kárákáre Tokwaeráp Kwarono.

Amo koumteouráp arop fárákapamp ninikan

youroukoup rá kot nap,

tá waráp kot te kare kar,

tá ponankor yae-párák kareno.” ✧

<sup>8</sup> Tá yiawor enselo náráp dis yámaran kwarákár  
nánko, Kwaro am arop fárákapan yámaramp  
yaomwi touwe fek numwar nánakáranorianánko,  
tak námpon.

<sup>9</sup> Am yámaramp yaomwi tokwae te kéntia  
waeria am arop fárákapan nánakár námpono.  
Aenám্পao maok, am fárákapao am Kwar kárákáre  
tokwaerápao am ankank kwatae tére nám্প man  
wouroump-séria, kwatae ninik pwarará Kwaromp  
e narek sampok mo napon. ✧

<sup>10</sup> Tá éntik enselo náráp dis yao pwae mekamp firamp sia king fek kwarákár. Aenánko, maomp yae ankore mek yakápnap arop firan kirikip tokwae korop. Aenánko, am fárákap touwe kwatae sámpría am táman námokuráp sérékam fek yourounkwe. ☆

<sup>11</sup> Am fárákapao náráp pouroukamp touwe, tá ankarápan ninikria yámar mekamp Kwarén wouroump sérar. Aenapao maok, náráp kwatae ninik nap younkwe sirarrá Kwaronámpok korop mono.

<sup>12</sup> Tá tokwam enselo náráp dis ént tokwae Yufretis mek kwarákár. Aenánko, ént ponankor torokwari pok nánko, yámar aoknámp mekamp king ntia ami fákáre korop mwanap mwae kup nánapi yak.

<sup>13</sup> Tá ono nke nanko, kwatae spirit yininkaopwe péni niamp ankwap wunépiramp táp meknámp korop, tá ankwap yao pwae mekamp firamp táp meknámp korop, tá ankwap kwekár profetomp táp meknámp korop.

<sup>14</sup> Am kwatae kare spirit te nkwakwe make kárákáre yorororia, mao te apárokamp ponankor aropamp kingonámpok tukup. Mao te tukupea am fárákap ntia maomp ami fákáreran ankára mek koupoukarea pwate nánko, am ponankor kárákáreráp Kwaromp yae tokwae fek yorowar mwanaprianámpon. ☆

<sup>15</sup> “Wawenke! Ono arop mér monámp ke fek oukun naenámp aropao koupour korop konámp araknámp yumonapok korop nanae! Aenanko,

táte arop amp moria, maomp waempyam fu fwapi poporakor karia yárák námp te, arop fárákapao maomp pouroukamp ankank nke moi napara, am arop te fwap warákár naenámpón.” ✧

16 Tá am kwatae spirit fákáre king ntia ami fákáre éréképá koropea Hibru kar fek ‘Armagedon’rá sér i konap fek koupoukarrá pwar.

17 Tá fákánek enselao náráp dis sámprá ouwipár yak námp mek kwarákár. Aenángo, Yiki Kor Nap mek Kwaromp sia king feknámp kar ankwap tékén arakrá sér, “Oukoumwan te wae pwarane.” ✧

18 Tá mékér wae pouri akwap nángo, tá pouroung tokwae korop nángo, oukurér tokwae párákap, tá némp yérur tokwae korop. Am némp yérur te yoporop tokwae, tá kápae kare por apárok yakápnap arop wokwae take pourouráp koropámp nke moi napan korop námpono. ✧

19 Aenángo, am taun tokwae yinink mwaek torokopi akwap nángo, kápae kare arop firamp taun tokwae apárok torokopi pikria kwatae akwap. Tá Kwaro taun tokwae Babilonomp ninikan ninikria nopok man kap wain fáraeria fopwaoka wae námpono. Am wain te Kwaromp yonkwae pwarámp tokwae karonó. ✧

20 Tá solwara mekamp apár amor ke ént mek wae fopweri pikrínk. Tá faonkwe ankwap ankáránk warko yak mono.

21 Tá warákam ais tokwae kar ékrínk. Pónankor am ais faokore ankákáránkamp kápae te 50 kilogram niamp arakeno. Am yámar meknámp

---

✧ 16:15: Lu 12:37-40; 1 Te 5:2; Yé 3:3 ✧ 16:17: Yé 16:1 ✧ 16:18: Yé 8:5 ✧ 16:19: Yé 14:8-10

arop pourouk éká pépér nánko, arop fárákap am warákam ais fek tapek touwe kwatae sámp napon. Tak nánko, am arop fárákap námwan ais warákamao fupuknámp fek táman Kwarén wouroump-séarar napon. ✧

## 17

### *Kwaro kokopor yupuan kot naenámp kar*

<sup>1</sup> Ensel fákánek, fákánek dis fákeyakápnap ou mekamp ankwap ankárank koropea onan sérrá, “Amo koropae! Mámá kokopor tokwae konámp yupu, mao te narek kápae kare ént tokwae yumuntuk tank námp, nopok touwe kwatae sámp naerianámp, ono amwan yéknép nae rae.

<sup>2</sup> Apárokamp king fákáre méntér kokoporrá paokopi napon. Tá apárokamp arop ponankor mao kuri méntér kokoporrá paokopria, mánmán ént fépéria ni konapnámp épépérép napon.” ✧

<sup>3</sup> Tá Yiki Kor Spirit onomp pourou mek koropá kárakáreria onan kakapea kwar saráp mek sakwap. Aenánko, ampok ono nke nanko, yupu ankárankamp yao pwae mekamp noumouri kor firamp yumuntuk tank. Am yao pwae mekamp firamp pourouk te kápae kare e kárámpá top-pwarámpá yakáp. Am e ponankor te Kwarén nkwakwe make wouroump-sénap eno. Tá am yao pwae mekamp fir te fákánek me korráp, tá fére-sámpramp souwe fákánek me korok aokránti rámp. ✧

<sup>4</sup> Am yupu te anánkaopwe pourouráp waempyam noumouri yirimpea, tá nkwakwe

make gol fekamp mopor yirir, tá kwapwe kare yumwi ntia mani tokwae fekamp anani kor \* yirimp. Tá mao gol fekamp kap yaek samp-tank. Tá nkwakwe make ninik Kwaro nke námp fek mákáre kare námp, tá nkwakwe make oumnámp ankank am yupuamp kokopor ninik fekamp, am ponankor am kap mek top-pwarámpeyak.

<sup>5</sup> Tá maomp e mao námokuráp yépe kor fek kumwi tenapo yak námp te am e fi te wounáp karonó. Maomp e kare te ará: “Taun tokwae Babilon. Mao te ponankor kokopor koumteou, tá Kwaro nke námp fek mákáre kwatae konap apárokamp ninikamp éntupwar karenono.”

<sup>6</sup> Am yupu te Kwaromp koumteouráp arop fárákap, tá arop fárákap Jisasén méria maomp e farákápnap arop fárákan tirá wouri námpon. Tá ono am yupuan nke nanko, am fárákapamp yiri fária mánmán nánko nke nampono. Ono am nkea korokop tokwaeria ono ninik tokwae.

<sup>7</sup> Tá enselo onan sérrá, “Amo apaeritea ninik tokwae rape? Ono amwan am yupuamp kar fi mek yak námp yéńkép nae. Tá am yao pwae mekamp fir fákánek me korráp, tá souwe fére-sámprampráp mao am yupu sámpea akwap námp yéńkép nae.

<sup>8</sup> Am yao pwae mekamp firan wae nkeapan maak, oukoumwan te yak mono. Aenámpan maak, nánkár wakmwaek am fi tikip monámp me éri tokwae pwarará narek aokea ponankor moyak naenámp. Apárokamp arop ankwap fárákap Kwaro am fárákan e wokwaek apár yoro mo

---

\* **17:4:** ‘Mani tokwae fekamp anani kor’rá sénámp fi te Matyu 13:45 fekamp kar fi nkeampo.

námp fek yiki yakáp mwanap aropamp buk fek kumwi mo námp, am arop fárákap am yao pwae mekamp firan nkea ninik tokwae mwanapon. Am te apae riteanápe, mao wokwaeek yakámpao maok, oukoumwan yak moitea, nánkár wakmwaek kopro naenámpon. ✧

<sup>9</sup> Yonkwae kourráp arop te fwap mámá ankank mér kare naenámpon. Mámá fákánek me kor te fákánek faonkwean wounáp niamp nánko, am yupu narek fákánek faonkwe wi fek tank námpon. Tá am fákánek me kor te fákánek kingén wounáp námpon.

<sup>10</sup> Éntik te wae moyakáp napo, ankárankamp mwar oukoumwan king yak nánko, ankwap ankárankamp te oukoumwan king yak mono, nánkár wakmwaek kánanke kwarok ke fek saráp king yakea pwar naenámpon.

<sup>11</sup> Tá am yao pwae mekamp fir wokwaeek yakámp, oukoumwan yak mo námp, am te yukupao yaknám kingono. Aenámpao maok, mao te fákánek kingént ankárankamp fi ara, ponankor kwatae akwap naenámpon.

<sup>12</sup> Tá amo fére-sámpramp souwe nke nap am te fére-sámpramp kingén wounáp námpon. Am fárákap te oukoumwan king yakáp mo napao maok, man kárákáre sánk napo, yao pwae mekamp firént tapokwapea ankárankamp ke fek saráp king yakáp mwanapon.

<sup>13</sup> Am king fárákap te námoku ankárankamp ninikráp sarápon. Am fárákap te e tokwae ntia

kárákáre tokwae te am yao pwae mekamp firan ponankor sánk mwanapon.

14 Am fárákap te Sipsip Moroként yorowar napo, Sipsip Morokao am fárákapan kwe-pwar naenámpón. Am te apae riteanápe, mao te ponankor tokwae kar yakápnáp arop fárákapamp Tokwae Kar, tá ponankor king fákáreramp Kingara námpón. Tá arop ponankor méntér yakáp nap te mao wumwiria nárápono ritenánko, am fárákap maomp karwaok kar tukup konap, am fárákapao kor Sipsip Moroként yorowar kwe-pwar mwanapon.” ☆

15 Tá am enselo onan sérrá, “Amo wae nke napono, mámá kápae kare ént tokwae kokopor yupu am yumuntut tank námp te, am te ponankor apár mekamp arop fi, tá tokwae kar arop fi koupoukarea yakáp nap, ponankor pourou yipiráp, tá ponankor karráp arakia yakáp nap támaono.

16 Am fére-sámpramp souwe amo nkenap, am te ponankor am yao pwae mekamp firént tapok-wapea kokopor yupuan ampwae sámp napon. Am fárákapao man sámpá yampourouria maomp waempyam ankank ponankor pouroukoup napo, pourou mwar yak naenámpón. Tá am fárákapao maomp pouroukamp émi fária man ponankor yaomwi mek yankap mwanapon. ☆

17 Ye! Kwaro am fárákapamp ninik mek tak mwanap ninik néńk nánko mwanapon. Wokwaek tak mwanaprá séri tari námpán napon. Am fárákap te ponankor ankár pourouráp ninik fek saráp am



kárákáre kingo námpan sámpea am ponankor yao puae mekamp fíran nénk mwanapon. Am fárákap te ankár takrá tukupea napo, Kwaro tak nanamp rá sérinámp ankank pwi naenámpo.

<sup>18</sup> Tá am yupu amo nke nap te, am taun tokwae apárokamp ponankor kingén poukwap námpan wounáp námpon.”

## 18

### *Babilon kwatae akwapnámp kar*

<sup>1</sup> Wakmwaek am pwar nánko, ono nke nanko, ensel ankwap yámar mek pwarará apárok ék. Mao te kárákáre tokwaerápao, maomp mopor te apárok wae tákapa wae.

<sup>2</sup> Mao tékén kar arakrá sér,  
“Taun tokwae Babilon wae kwatae akwapáne.  
Mao te wae kwatae akwap teane.  
Oukoumwan te am taun te  
kwatae-spirit fákáreramp taun yak námpon.

Kwatae-spirit fákáre,  
tá ounnámp ant fákáre,  
tá kwatae kare ant fákáre,  
támao kuri am mek yakáp napon.

<sup>3</sup> Am te apae riteanápe,  
ponankor fi méntér kokopori napon.

Am te ará:  
Am ponankor arop fi méntér kokopor ninik nap te,  
am fárákap kárákáre kor wain ént fánap niampon.

Tá apárokamp king fákáre  
mao kor mént kokopori napon.  
Tá apárokamp bisnis arop fárákap  
mani sámp mwanap térerá

am yupuamp nkwakwe make kíkiank nínik tok-  
wae fek  
mani tokwae ti naponó.”

<sup>4</sup>Tá ono wa nanko, yámar meknámp kar ankwap  
arará sér,

“Onomp koumteouráp arop fárákap,  
yumo ankár am taun pwararea ek koropenke!

Takria yumo maomp kwatae níniként  
tukupá tapokwap mwanape.

Tá yumo méntér tapokwapria yumo énéńki  
kwatae nínik fek nopok sámp mwanape. ✧

<sup>5</sup>Maomp kwatae nínik te

yu tokwae koupoukarrá pokea yámar mek  
námpono.

Kwar te am taunamp kwatae nínik ponankor te  
waeman niki yak námpon.

<sup>6</sup>Yumo ankár am kokopor yupuamp

nkwakwe make kwatae ankank fek  
ankár nopok kor, take pourouráp fek pwi pap  
mwanapon.

Mao yumwan mokope pourouráp kwatae níniki  
námpe te,

nopok kuri am yumuntuk ankwap kouk-  
oumoumpia sánkenke.

Mao te wae kárákáre kor mánmán ént  
kap mek ouroukoupea yumwan sánk námpon.

Yumo ankár maomp kap mek

kárákáre kor mánmán ént ankwap  
koukoumoumpia sánk napo, fárano. ✧

<sup>7</sup>Mao námokuráp e sakapria

kápae kare nkwakwe make ankank

námokuráp pourouk warákár sánk naenámpan  
saráp  
tére konámpon.

Aenámpara, yumo ankár kápae kare touwe sámpea  
éma wae naenámp nopokinámp niamp take sánk  
kipo.

Mao te námokuráp ninik mek sérrá,  
‘Ono te Kwin yakria  
sia kwin fek tank namp’rá sér i konámpon.  
‘Námo te kae yupu niampao kwaporok yak nam-  
panápe.

Námwan te touwe kwatae korop nánko,  
námo ém mo kareno’rá sér i konámpon.

<sup>8</sup> Aenámpan maok,  
nkwakwe make kwatae kare ankank  
man ankárankamp yae fek saráp korop naenámpon.  
Nkwakwe make touwe tokwae korop nánko,  
kápae kare arop éménka wae,  
tá yae-porokwe tokwae korop naenámpon.  
Tá Babilon te ponankor yaomwirao fánaenámpon.  
Ye! Am te apaeritea námpanápe,  
Kárákáre Tokwaeráp Kwar Tokwaerao  
maomp kwatae ninik waeman youroukoupi  
námpan,  
‘Nopok touwe kwatae sámp naenámp’rá  
sénámpon.’ ✧

<sup>9</sup> King fákáre mao am taun tokwaerént méntér  
kokopori nap, tá méntér nkwakwe make kápae  
kare ankank sámp napan saráp tére napon. Ae-  
napara, am king fárákap man yaomwirao fánánko  
souri korop námp nkea, am fárákap náráp éntér kor  
fek yae poporokwaprá éménk mwanapon.

---

✧ 18:8: Yé 11:17-18

<sup>10</sup> Mao am touwe kwatae sámp nánko, am fárakap námoku kor am take touwe sámp mwana-para, apáp tirinka waeria panek foukouri yakáprá arakrá sér, “Koupouteane, koupouteane, Babilon koupouteane. Am taun tokwae, amo kárakáre kor taun nono. Ankárankamp ke fek saráp nopok touwe kwatae amwan koropáne.” ☆

<sup>11</sup> Tá apárokamp bisnis arop fárakap am taun támantá éménkrá yonkwae touwe napon. Am te apae riteanápe, arop maomp ankank tirá, mani nénk mwanap arop warko yak mono.

<sup>12</sup> Am ankank te gol, silva, kwapwe kare yumwi, mani tokwae fekamp anani kor, tá wupwi kor waempyam kwapwe, tá nkwakwe make noumouri kor waempyam, tá waempyam waentar fekamp aráno. Tá kápae kare nkwakwe make nánákáre kwapwe konámp yao, tá ankank ponankor elefan souwe fek yoroinap, tá ankank ponankor mani tokwae fekamp yao fek yoroi nap, tá bras, tá ain, tá kukumwi kwapweráp yumwi fek yoroi nap.

<sup>13</sup> Tá ankwap te ará ankank: Sinamon, tá fári konap far, tá yankap konap paura nánákáre, tá nkwakwe make wouri nánákáre, tá sanda kwapwe, tá wain, tá wel, tá pan kwapwe, tá wit, tá bulmakau, tá sipsip, tá hos ntia karis, tá slev yak naenámp arop, maomp ninik ntia pourou mani fek sámp konap. Mámá ankank warko mani fek te mono.

<sup>14</sup> Bisnis tére konap arop fárakap arakrá man sér mwarea napon: “Am kwapwe kare ankank amo sámp nae kar ri konap te, waeman ponankor

---

☆ **18:10:** Yé 19:2-3

amwan pwar-akwap tenámpon. Waráp mani tokwae fekamp kwapwe kare ankank ntia waráp kwapwe kare mopor ankank te, wae ponankor amwan pwar-akwap námpon. Amo am ankank warko sámp mono.”

<sup>15</sup> Tá bisnis arop fárákap am ankank takrá térieria am taun mek mani kápae kare tákap konap arop fárákap te am taun tokwaerao touwe tokwae sámp nánko, nkea námwan am touwe kwatae korop naenámpan apáp tirink mwanapon. Tá am fárákap panek fokouri yakáprá éménkrá yonkwae touwe tokwae mwanapon.

<sup>16</sup> Am fárákapao sérrá, “Koupouteane, koupouteane, am taun tokwae koupouteane! Wokwaek mao te wupwi kor waempyam yirímp, tá nkwakwe make noumouri kor waempyam, tá maomp pouroukamp mopor kwapwe, gol, tá yumwi kwapwe ntia mani tokwae fekamp anani kor yiriria yakámpon!

<sup>17</sup> Aempan ankáránkamp ke fek saráp takánko, maomp ponankor mani, tá am mopor ankank ponankor kwatae akwap tenámpon!”

Tá sip mekamp kepten ponankor, tá ponankor arop mani fek sip mek kounkouria ankwap némpouk tukup konap, tá sip mek tére konap arop ponankor, tá arop ponankor solwara mek mani tákap mwanap tére konap, am arop fárákap panek fokouri yakáp mwanapon.

<sup>18</sup> Tá am fárákapao nke napo, am taun wouroukour-námp yaomwi souri nkea arakrá wumwi, “Apaé taun mámá taun tokwae niamp yak námpon?”

19 Aeria am fárákap woup kwar yokwaprá námokuráp me korok épérrá yonkwae touweria éménk. Tá am fárákapao wumwirá, “Koupouteane! Mámá taun tokwae koupouteane! Kápae kare sip solwara mek paokop nap, mámá taun tokwae mekamp maní tokwaeráp yakáp i konapono. Koupoute kare, ankárankamp ke fek saráp am ponankor kwatae akwapáne!”

20 Ankwapao kar arakrá sér: “Yumo yámar me ntia Kwaromp kourteouráp arop fárákap, tá yumo aposel, tá profet, yumo ponankor fwap oukoumwan mámá ankank am taun mek korop námp warákáránk mwanapono. Kwaro man youroukoupia nopok touwe kwatae sánk námpono. Tá amnámp niník te am taun támao yumwan kwatae sokoroi nap fek námpon.” ☆

21 Am kar pwar nánko, kárakáre kor ensel ankwap yumwi tokwae ankárank wit yánk nounounkrá aokop konámp tokwae niamp sámpea, mao am yumwi tokwae kakapea solwara mek sir. Aeria mao sérrá, “Ono mámá yumwi sinamp máte nánkárap taun tokwae Babilon mámaknámp kárakáre kare fek sinapo, arop fárákap warko nke mo mwanapono.

22 Aeria gita aráp, tá nkwakwe make musik, tá poum ke mek fokop nap, tá wur foupour nap, take pourouráp arápánk te, arop fárákapao warko amo yak nap meknámp tak nánko, wa mono. Tá arop ponankor nkwakwe make tére méria yakápnap aropao amo yak nap mek warko take pourouráp arop nke mono. Wit sokwapnámp yumwi ounk te warko yak nánko, arop fárákap wa mono.

---

☆ 18:20: Yé 19:1-2

<sup>23</sup> Aropao amo yak nap mekamp lam wae te nke mono. Tá amo yak nap mek tameknámp poumarop yupu sámp naenámp kar, tá yupu poumou nap mek tank naenámp kar wa mono. Wokwaek waráp bisnis térenap arop fárákap apárokamp arop nununkwi yakápi naponó. Ta kápaé kare arop fárákapán amo foupourrá kwekár sérari naponó.”

<sup>24</sup> Ta Kwaro am taun nke nánko te, profet fákáre, tá maomp kounteouráp arop tirá wourinap kwatae ninik te am taun mek yak námpon. Apárokamp arop ponankor yopor aropao tirá wouri nap am támao kor am Babilonomp pourouk sarápi yak námpon.

## 19

### *Yámar mek arop fárákap warákár tokwaenap kar*

<sup>1</sup> Am takianánko, wakmwaek ono wa nanko, yámar mek yakápnap kounteouráp arop ou tokwaeramp wumwi kar tokwae korop. Am fárákapao sérrá, “Nomo Kwaromp e narek sampok mwaro! Nomp Kwar te mao ankárankamp támao saráp námwan warko érékép námpon. Mao e tokwae, tá kárakáre tokwaerápono.

<sup>2</sup> Kot mek te Kwaro arop fárákapán kwapwe kare ninik fek yae-párak kare youroukoup i konámpon. Am kokopor yupu am te apárokamp kápaé kare aropan náráp kokopor ninik fek kwataerá kák námpono. Aenámpantá, Kwaro nopok man touwe kwatae sánk námpono. Am yupu támao Kwaromp tére arop fárákap tirá wouri tae rinámpantá Kwaro

nopok mao kwatae niniki námƀ fek érou námpono.”

✧

<sup>3</sup> Tá am fárakapao warko arakrá wumwi, “Nomo Kwaromp e narek sampok mwaro. Am némp tokwae wouroukournámƀ yaomwi souri yámar mek pok saráp yak námpon.” ✧

<sup>4</sup> Tá 24 taokeyakáp konap arop ntia yiworaopwe ankank yiki yakáp námƀ am fárakap Kwaromp wonae fik pourou méntér éntér mwaeknámƀ tukuprá Kwaro sia king fek tank nánko, man lotu. Aeria am fárakapao sérrá, “Kare karonó. Nomo Kwaromp e narek sampok mwaro.” ✧

<sup>5</sup> Tá Kwaromp sia king feknámƀ wumwinámƀ kar koropria arakrá sér, “Yumo Kwaromp téré arop, tá yumo párák kar yakápnap arop, ntia yumo e tokwaeráp arop fárakap yumo Kwarén apáp i konap, yumo ponankor Kwaromp e narek sampokenke!”

*Sipsip Morokao yupu sámƀria fír kékérounámƀ kar*

<sup>6</sup> Tá ono wa nanko te, koumteouráp arop kápae kare fi koupoukarrá yakáprá kar ounka wae nap niamp korop. Tá ént ounk kápae karerao souroukoup tokwae námƀ niamp, ta oukurér tokwaerao pourounka wae námƀ niamp. Am wumwi kar arakrá sér,

“Nomo Kwaromp e narek sampok mwaro!

Tokwae Kar te

mao nomp Kwar Ponankor Kárakáre

Tokwaerápono!

Oukoumwan te mao King Tokwae yak námpon! ✧

---

✧ 19:2: Yé 6:10 ✧ 19:3: Yé 14:11 ✧ 19:4: Yé 4:9-11 ✧ 19:6: Yé 11:15-18; 14:2-3



<sup>7</sup> Oukoumwán te nomo fwáp yonkwae kárámpría warákára waerá maomp e narek sampok mwanámpono!

Sipsip Morokao yupu sámp naerianámp ke te wae korop námpon!

Tá maomp yupúao kor wae nánapi yak námpon. ✧

<sup>8</sup> Tá Kwaro man waempyam wupwi korao yiki kareria waentar kwapwe námp man sánk nánko, maomp pourouk yirimp.”

Am kwapwe kare wupwi kor waempyam te Kwaromp koumteouráp arop fárakapoinap yae-párak kare ninikan sénámpon. ✧

<sup>9</sup> Tá onan enselo sérrá, “Amo mámara kar kumwiae: Am arop fárakap Kwaro Sipsip Morokao yupu sámpria fir kékérou námp fek koropenkria wumwinámp arop fárakap te fwáp warákár mwanapono.” Tá mao onan sérrá, “Mámara kar te Kwaromp kare kar karonó.” ✧

<sup>10</sup> Aenánko, ono enselomp puk wonae fik piká párákapria man lotu naeria nanko maok, mao onan sérrá, “Amo taki kwapono! Ono te amo ntia waráp ankwapyaenámp Jisaso farákápnámp kar kárakáre fek sámp fákeyak nap, yumont ankáránkamp tére aropono. Amo ankár Kwar ankárankan saráp lotuampo. Am kare kar kar Jisas námoku farákápnámp táman, Yiki Kor Spiritao sámpea profet fákáreran ninik nénk nánko, Jisasomp e érik farákápnámp konapono.” ✧

*Arop wupwi kor hos fek narek tanknámp kar*

11 Tá ono nke nanko, yámar me kikir akwap nánko, wupwi kor hos ankárankamp yak. Arop am fek tank námp maomp e te ará: ‘Arop námoku térenámp ankár pwar mo i konámp’, tá ‘Kwapwe kare nínik fek saráp i konámp Arop’. Táte mao koumteouráp aropan kotrá youroukoup námp, tá mao yorowar naerianámp, mao te ankár yae-párák kare nínik fek saráp i konámpon.

12 Maomp yi te yaomwirao yurunk námp niamp, tá mao te kingamp kump kápae kare maomp yépe kor fek yakáp námpon. Maomp pourouk e kumwi tenapo yak námp, am te mao námoku saráp mér námpono. Arop ankwap te mér mono. ✧

13 Maomp waempyam éri te yiri forokwap rámpán yirímp námpono. Tá maomp e te ‘Kwaromp Kar’. ✧

14 Yámar mekamp ami fákáre te náráp wupwi kor hos fek tankápria, am fárákap maomp wakmwaek tukup. Am fárákapamp pourouk yirirínáp waempyam te wupwi korria yink kwapwe námpono.

15 Maomp táp meknámp bainat wiráp kare yak námp, am bainat ek oukur korop. Aenánko, mao ponankor arop firan am bainat fek tapek yorowaria kwe-pwar naenámpono. Tá mao ain yaopwae sámpea koumteouráp aropan kárákáre fek poukeyak. Mao yumwi fekamp wain ki fákákap konap tang mek pumpurékamprá wain ént fákákap naenámpono. Am te Ponankor Kárákáre Tokwaeráp Kwaromp yonkwae pwarámp tokwaeran wounáprá sénámpono. ✧

16 Mao te maomp e maomp waempyam fu fek, tá maomp punampore kor mwaekamp waempyam fek e kumwi tenap yak námpono. Am e te ará: “Ponankor kingamp King, tá ponankor tokwae kar yakápnap arop fárakapamp Tokwae Karono.” ✧

17 Tá ono nke nanko, ensel ankwap yámar yokor námp mek fokopeyak. Mao ant fákáre amorik furukarea paokop napan tékén wumwia sérrá, “Yumo koropea Kwaromp fir kékérou tokwae fek koupoukourenke!

18 Aeria yumo fwap king fákáreramp pouroukampi émi fár, tá ami kepten tokwae, tá kárakáre kor aropamp émi fár, tá hos fákáre ntia am fek tankápnap arop fárakapamp émi fár mwanaponno. Yumo ponankor aropamp émi fépéria amwar yakápnap arop farákáp ntia slev térenámp arop fárakap, tá kwaporok yakápnap arop fárakap, ntia e tokwaeráp arop fárakapamp émi fár mwanapon.”

19 Tá ono nke nanko, yao pwae mekamp fir, tá apárokamp king fákáre, ntia am fárakapamp ami fákáre wae koupoukour yakáp. Am fárakap te am hos fek tanknámp aropan yorowarrá, tá maomp ami fákárerént yorowar mwarea napon. ✧

20 Aenapan maok, mao am yao pwae mekamp fir ntia kwekár profetén ‘Fápákampi kák námpon. Am profet mao te wokwaek yao pwae mekamp firaonke námp fek nkwakwe make kárakáre yororia kountouráp aropan poupwékáp námpono. Aenánko, arop fárakap te manénkir yao pwae mekamp firamp e fek náráp pourouk kumwi tiria,

maomp wunérian lotuiapon. Yao pwae mekamp fir ntia kwekár profet, am yawor te oukoumwan yiki yak nep fek yumwi salfa fek yaomwi yurunk nánko, kéntia waenámp me aokore mek épéri pwar napon. ✧

<sup>21</sup> Tá am hos fek tanknámp arop, mao am yao pwae mekamp firamp wunérian lotunap ami fákárean am bainat éri maomp táp meknámp korop námp am fek paoki pwar námpon. Aetenánko, ant fákáre am arop fárákapamp émi fépéria yare tokwae napon. ✧

## 20

### *Satan 1,000 yopwar fek fákápá yak naenámp kar*

<sup>1</sup> Tá ono nke nanko, ensel ankwap yámar mek pwarará apárok ék. Mao te me fi tikipnámp yak monámp ménkiramp ki, tá sen tokwae makia yaek sámpá ék námpon. ✧

<sup>2</sup> Mao am wunépiran sámpea yarokwap námp am te wae wokwaek karkamp tákamono. Am arop támao kápae kare aropan kot i konámp mao te Satan nono. Tá ensel man sen fek 1,000 yopwar fek yak naenámpria yarokwapea pap.

<sup>3</sup> Enselo man fi tikip monámp me tokwae mek sámp-sirarrá yumuntuk ménki kéria kárákáre fek farákapea pwar. Aetenánko, Satan te warko koumteouráp arop fárákap poupwekáp mono. Mao te nánkár yépékie 1,000 yopwar pwar nánko, wakmwaek man aokor-pwar napo, mao fae tákáre ke fek saráp yáarak naenámp. ✧

✧ **19:20:** Yé 13:11-17; 20:10 ✧ **19:21:** Yé 19:17-18 ✧ **20:1:** Yé 9:1

✧ **20:3:** Ju 6; Yé 12:9

<sup>4</sup> Tá ono nke nanko, sia king ankwap yakáp nánko, am fek arop ankwap fárákáp tankáp. Kwaro am fárákapan arop youroukouprá kot mwanap kárákáre nénk. Tá ono nke nanko, kápae kare Jisasén méria maomp e érik farákápria Kwaromp kar kárákáre fek farákáp napo, am fek yápare kor fápákárrá épérip aropamp waemp yakáp. Am fárákáp te yao pwae mekamp fir ntia maomp wunérian lotu mo, tá maomp taok papnám kumwi am fárákápamp yépe kor fek ntia yaek yak monap arop fárákáp támaono. Am sumpwinap arop fárákáp warko yiki yak sámpea Kraisént king yakáprá tukupea 1,000 yopwar fek napon. ✧

<sup>5-6</sup> Am te manénkir arop fárákáp apár me meknám warko ferámpnap keno. Am arop fárákáp manénkir ferámp nap te fwap Kwaro námokuráponorá nánkáráp námpara, fwap amwar kar yakáprá warákár mwanapon. Anánk por sumpwi te am fárákapan apárok tirá nér naenám kárákáre yak mono. Waeman Kwar ntia Kraisomp pris fákáre yakápria, waeman Kraisént am 1,000 yopwar fek king yakáp mwanapon. (Aeno ankwap sumpwi arop fárákáp te am ke fek ferámp mono. Nánkár am 1,000 yopwar yépékia pwar nánko mwanapon.) ✧

### *Satan touwe tokwae sámp naenám kar*

<sup>7</sup> Wakmwaek am 1,000 yopwar wae pwar nánko, am kalabus nap ménki kíkír akwap nánko, Satan fákápá yaknám wae pwar naenampon.

---

✧ **20:4:** Dan 7:27; 1 Ko 6:2; Yé 6:9; 13:16-17 ✧ **20:5-6:** 1 Pi 2:9; Yé 2:11

<sup>8</sup> Tá mao érik aokea ponankor apár mekamp yakápnap arop fárákap Gok ntia Magokomp arop firan poupwekáp naenámpón. Satan te am fárákapan akwapea koupoukarea éréképea yorowar naenámpón. Am fárákap te kouroump mwanap pourou mono, ént mekamp kárák niampono.

<sup>9</sup> Tá am fárákapao kápae kare apárok mwaek koropánkria Kwaromp koumteouráp arop fárákap ntia am Kwaro warákár konámp taun sámp-saokarrá souroumpour mwanapono. Aenapan maok, yaomwi yámar meknámp ékria am ami fárákapan ponankor wouroukoup naenámpón.

<sup>10</sup> Satano am fárákapan poupwekápianámpara, Kwaro man me aokore tokwae mek salfa yumwi fek yurunknámp yaomwi touwe mek sinaenámpóno. Yao pwae mekamp fir, tá kwekár profet am yawor wae am mek yak nepan, am yininkaopwe te wae fek, tá kumuruk kuri, ankár touwe tokwae sámprá yakápi-yakáp mwanapon.

*Kwaro kot tokwae naenámp kar*

<sup>11</sup> Tá ono nke nanko, wupwi kor sia king tokwae tank náńko, am fek Kwaro tank. Tá apár ntia yámar me wokwae farákap akwap teria, warko yak mo.

<sup>12</sup> Tá ono nke nanko, sumpwi arop fákáre yakáp nap te, am arop fárákap te e tokwaeráp arop fárákap, tá kwaporok yakápnap arop fárákap, takia sia king wonae fik foukouri yakáp. Tá arop sia fek tank námpao, mao buk ankwapmwaek tia aokop. Mao buk ankwapan kor aok-pwar námp, am te yiki yak sámp mwanap aropamp eráp bukono. Tá mao tankrá ponankor sumpwi aropaoínap Buk

fek yak námp am kumwi nkerá am fek maopianap ankank puri fek youroukoup námpono. ✧

13 Solwara warko am mekamp sumpwi arop yakáp nap tirá kérép, tá apár me ntia Waempomp Némp te am mek yakápnap waemp warko tirá kérép. Aenánko, youroukoup i konámp arop am fárákapan ponankor maoinap ankank puri fek yurukup námpon. ✧

14 Mao Sumpwi ntia Waempomp Némp am yaomwi tokwaeráp me tokwae éri mek tirá épér námpon. Am yaomwiráp me tokwae mek pik námp te anánk sumpwino. ✧

15 Táte arop ponankor maomp e yiki yakáp mwanap aropamp eráp buk fek tank mo nánko te, am aropan yaomwiráp me tokwae mek tirá épér mwanapon. ✧

## 21

*Kwaro yámar me ntia apár wourékam yoronámp kar*

1 Oukoumwan te ono nke nanko, yámar me wourékam, tá apár wourékam yak námpono. Manénkirkamp yámar me ntia apár waeman ponankor akwap tenámpono. Solwara warko yak mono. ✧

2 Tá ono am Yiki Kor Taun nke nanko maok, am te wourékam Jerusalem. Am taun te Kwarént yakeanámpao, yámar me pwarará apárok ék. Am te yupurao poumou nap mek tank naeria nánapria mopor i konámp niampono. ✧

✧ **20:12:** Ap 17:31; 2 Ko 5:10; Yé 13:8; 19:5 ✧ **20:13:** Ro 2:6; Yé 22:12 ✧ **20:14:** 1 Ko 15:24-26,54-55 ✧ **20:15:** Mt 25:41 ✧ **21:1:** 2 Pi 3:13 ✧ **21:2:** Hi 11:16; Yé 3:12

<sup>3</sup> Tá ono wa nanko, sia king feknámp tékén arakrá wumwi, “Nkeae! Oukoumwan te Kwaromp nap koumteouráp arop fárákapént yak námpono! Am te am fárákapamp ou mek yak nánko, mao te Kwaromp koumteouráp arop yakáp mwanaponno. Ye! Kwar námoku am fárákapént yakea, maomp Kwar yak naenámpno.

<sup>4</sup> Mao fwap am fárákapamp yi mekamp énti ponankor torokor naenámpno. Aenángo arop fárákap te warko sumpwi mo, yonkwae touwe mo, éménk mo, touwe sámp mono. Am wokwaekamp ankank te waeman ponankor pwate námpon.” ✧

<sup>5</sup> Tá am Arop sia king fek tank námp mao sérrá, “Yumo nkenke! Ono ponankor ankank te waeman wourékam yoroi pap nampono.” Tá mao warko onan sérrá, “Mámá kar te ponankor waeman kare kar ara, ponankor arop fwap mér kare mwanapon. Kumwiae!”

<sup>6</sup> Mao onan warko sérrá, “Mámá ponankor ankank wae korop námpon. Máte ono támao ono meki yak, tá ono wakmwaek kar yak nampono. Ono kápae kare ankankamp fi kor, tá ono kápae kare tére ponankor térea pwar konampono. Táte arop ént nikip nánko te, ono fwap yiki yak konámp ént oukurnámp mekamp ént man sánk nanko, fánaenámpno.” ✧

<sup>7</sup> Táte arop yorowar kwe-pwarareanángo te, Ono fwap am ankank nénk nanampon. Aeria ono maomp Kwar yak nanko, mao onomp táráp yak naenámpno.” ✧

---

✧ **21:4:** 1 Ko 15:24-26; Yé 7:17    ✧ **21:6:** Ais 55:1; Jo 7:37; Yé 1:8; 22:13,17    ✧ **21:7:** Ro 8:14-17



<sup>8</sup> Aeno arop apápria arári tukup, tá arop Kwarén mér te monoria younkwe sánk konap, tá nkwakwe make kwatae kare ninikráp arop, tá arop tirá wour, tá kokopor ninik, tá foupou, tá kwekár kwarén lotu, tá kwekár i konap, arak i konap arop fárakap te, maomp némp sámp mwanap te yaomwiráp me tokwae salfa yumwi fek yurunknám am kénti mek pik mwanapon. Am te anánk sumpwino.”

*Jerusalem wourékaman sénámp kar*

<sup>9</sup> Tá ensel ankwap ononampok korop. Am te fákánek ensel arop kwatae pap mwanap fákánek ankank kwataeráp dis samp nap ou mekamp ankwapono. Tá am ensel onan sérrá, “Amo koropae! Ono amwan Sipsip Morokan yupu oukoumwan táman maomp nap mek tank námp yéńkép nae.”

<sup>10</sup> Yiki Kor Spirit onomp pourou mek koro-pea kárakáre nánko maok, enselo onan kakapea faonkwe tokwae fek narek karaok sampok. Tá mao onan am Yiki Kor Taun Jerusalem Kwarént yakea yámar me pwarará ék námp yéńkép. ✧

<sup>11</sup> Aenánko, Kwaromp wae tokwae am taun mek wae pouri yak. Am wae te mwar pourourápria mani tokwae fekamp yumwi wae niamp pourouráp. Ye! Am te yumwi jasper niampria glas niamp pourouráp koukwe kare.

<sup>12</sup> Am taun te yár tokwae narek karaok pok námpon. Am éntér-sámpramp ménki te yár mek

---

✧ **21:10:** Ef 5:27; Yé 15:1; 21:2

yakáp nánko, éntér-sámpramp ensel am ménki ponankor wonae fik foukouri yakáp napon. Tá éntér-sámpramp Israel firamp e am ménki fek yakáp námpon.

13 Yámar aoknámp mwaekamp yár te ménki yininkaopwerápono. Tá yae-párák mwaek kiríkiri yár te taknámp ménki yininkaopweno. Tá yae-mánkwan mwaek kiríkiri yár mek te taknámp yininkaopwenono. Tá yámar piknámp mwaek kiríkiri yár mek te taknámp yininkaopweno.

14 Am taun yár fi mek te éntér-sámpramp yumwirao yár fi mek kárákáre sánk námpon. Tá Sipsip Morokamp éntér-sámpramp aposel fákáreramp e am yumwi fek yakáp námpono.

15 Am ensel onont kar sénámp te, am taun purumpria yár ntia ménki pupur naenámp gol fekamp yaopwae sámp-fákeyak.

16 Am yár fwe yiawor mwaek te ankárankamp puri fekampono. Ensel te náráp yaopwae am fek némp purumprá akwapeanámp te 2,200 kilomitanono. Am taun tokwaeran purump námp te top yawor ntia aop yawor, tá narek pok námp te, ankárankamp puri fekampono.

17 Mao am yáran kor purumpea am yár ouwou te 144 metano. Am meta te arop fárákapao náráp ankank pupur i konap niampono. Tá ensel am yár purump námpao kor, am meta támaono.

18 Am taunamp yár te Kwaro jaspera yumwi fek yoroí námpon. Tá mao taun táman kor gol fek saráp yoroianánko, am taun te glas wae niamp wae tokwae námpono.

19 Yár fi mek te Kwaro nkwakwe make yumwi

mani tokwae fekamp fek moporia pwate námpon. Ankárankamp yumwi kwapwe am yár fi mek yaknámp te jaspá. Anánk te muru kor yumwi sapaia. Tá yinink te wupwi kor yumwi aget. Yi-awor te yiki kor yumwi emeral.

<sup>20</sup> Éntik te sadoniks yumwi am te noumouri wupwi méntérnámp. Tá tokwam te noumouri kor yumwi konilian. Tá fákánek te yar kor yumwi krisolait. Yukup te ankwap pourouráp yiki kor yumwi beril. Sárak te mwar pourouráp yar kor yumwi topas. Tá fére te yumwi krisopres. Am te yiki kor niamp, tá yar méntérámp. Mom te mwar pourouráp muru kor yumwi jasint. Tá éntér te mwar pourouráp noumouri kor yumwi ametis.

<sup>21</sup> Am éntér-sámpramp ménki fek te éntér-sámpramp mani tokwae fekamp anani kor yak námpono. Ménki ponankor te ankárankamp anani kor tokwae mwarono. Am taun mekamp mwae kup te ponankor gol fekamp saráp nánko, glas wae niamp koukwe faokor akwap námpon.

<sup>22</sup> Aenámpan maok, ono te am némpoukamp Yiki Kor Nap nke mono. Ponankor kárákáreráp Kwar Tokwae ntia Sipsip Morok am yawor námoku támao am mekamp Yiki Kor Nap yak nepon.

<sup>23</sup> Tá am taun mek te yámar ntia yunkamp wae te warko tére mono. Am te apaeria, Kwaromp wae tokwae támao am mek wae sánk námpon. Tá Sipsip Morok mao námoku am mek yokor konámp lamono. ✧

<sup>24</sup> Ponankor arop fi te am némpoukamp wae fek saráp paokop mwanapon. Tá apárokamp king

fákáre náráp mopor ankank am mek ti-korop mwanapon.

<sup>25</sup> Yámaraok am yár ménki te kér mono. Tá kirikip te am némpouk korop mono.

<sup>26</sup> Ponankor arop firamp mopor ankank ntia mani am mek ti-korop mwanapon.

<sup>27</sup> Aeno ankank ounnám, tá arop nkwakwe make pwarápae sánk konám ninik kwatae konap, tá arop kwekár ninik i konap, am te am mek yink mo kareno. Sipsip Morokao arop ankwap fárákapamp e Yiki Yak sámp mwanap Buk fek kumwi tenám am arop fárákap mao saráp fwap am némpouk tukup mwanapon. ☆

## 22

### *Yiki yaknám ént ntia yaoan sénám kar*

<sup>1</sup> Tá am ensel onan ént tokwae yéknép nám, am te yiki yak sánknám éntao maok, ént te glas niamp koukwe kare. Am ént te Kwar ntia Sipsip Morokamp sia king feknám oukarea,

<sup>2</sup> am némpouk mwaepárak akwap námpon. Am ént woupwiaok te maomwaek fi mwaek, tá nkwanwaek fi mwaek kor yiki yak nénknám yao yakáp námpon. Am yao te ankáránkamp yopwar fek éntér-sámpramp por ki tank konámpon. Ankár yunk méntép tank konámpon. Tá am yao pwae te ponankor koumteouráp arop firamp pourou mekmwaek fwapokwap i konámpon. ☆

<sup>3</sup> Tá kápae kare ankank Kwaro warákár moria kwatae akwapanoria nám te, maomp taun mek yak mo kareno.

☆ **21:27:** 1 Ko 6:9-10; Yé 3:5; 13:8 ☆ **22:2:** Stt 2:9; Ese 47:1,12; Sek 14:8

Kwar ntia Sipsip Morokamp sia king te am taun mek yak naenámpón. Tá Kwaromp tére arop man lotu mwanapon. ✧

<sup>4</sup> Tá am fárákap takria Kwaromp yimetáp nke mwanapon. Tá mao am fárákapamp yépe kór fek náráp e kukumwi naenámpón. ✧

<sup>5</sup> Kírikíp te warko korop mono. Tá Kwar Tokwae Kar mao saráp am fárákapán wae sánk naenámpara, lam wae, tá yámar wae warko tére mono. Tá am fárákapao king yaká yakáp mwanapon. ✧

*Jisas te koupour ék naenámpóno'rá sénámp kar*

<sup>6</sup> Tá ensel onan arakrá sér, “Mámá kar te wae-man kare karonó. Ponankor arop fwap táman mér kare mwanapon. Kwar Tokwae Karao profet fákáreran náráp kar farákáp mwanap kwapwe kare nínik maomp nínik mek kákria, náráp ensel sámp-kérép nánko, maomp tére arop ponankoran wakmwaek koupour kar korop naenámp ankank ponankor yékn námpóno.”

<sup>7</sup> Tá Jisaso sérrá, “Yumo wawenk! Ono yumonapok koupour kar korop nanae! Táte arop ankwap mámá buk fek yaknámprofet kar wawia mántwaok námp te, Kwaro man ourour sánk naenámpón.”

<sup>8</sup> Ono Jon ono am kar wawia, tá am ankank nke nampono. Ono wae wawia nkea pwarará, ono am ankank yéknámprofet enselomp puk piká párákaprá man lotu naeria.

<sup>9</sup> Aenanko maok, mao onan sérrá, “Amo taki kwaponó. Ono te amo ntia waráp ankwapyaenámp profet fákáre, yumont nomo ankáránkamp tére

konámpono. Tá ono ponankor arop fárákap máma buk fek yaknám karwaok i konap, maomp ankárankamp tére aropono. Aeno amo ankár Kwar ankárankampan saráp lotuampo.”

<sup>10</sup> Tá mao onan sérrá, “Máma Kwaromp kar máma buk fek yak nám te amo mek wouroump kwapono. Mono! Kwaro am ankank tére naenám ke te waeman wonae fik námpono.

<sup>11</sup> Aenámpara, arop kwatae ninik i konám te, waeman ankár kwatae niniki nám támao yak naerámpon. Arop oumnám ninik i konám te, waeman oumnám ninik támao yak naerámpon. Tá arop yae-párak kare ninik i konám te wae fwap yae-párak kare ninik támao yak naenámpon. Tá arop yiki kukarrá yak nám te waeman fwap am yiki kukarea yaknám ninik támao yak naerámpon.”

<sup>12</sup> Jisaso sérrá, “Yumo wawenk! Ono te koupour korop nanampon! Tá ono kápae kare aropan nopok nénk nanamp tia korop nanampon. Aeria arop ponankor ankákárankrá ankank maoinap ninik puri fek nénk nanampon.

<sup>13</sup> Ono saráp ono mekia akwap, ono saráp wakmwaek kar yak nampon. Ono támao manénkir ankárank feknám pia akwapea wakmwaek kar pwar nám fekonó. Ono te kápae kare ankank ponankor fi korara, ono ponankor térea pwar konampon.

<sup>14</sup> Koumteouráp arop fárákap náráp waempyam yárar korrá yakáp nap te, Kwaro man ourour nénk naenámpon. Am fárákap yiki yak sánknám yao ki fár mwanap te fwap pwi námpon. Tá am

fárákap Kwaromp taun mek youmpnám mênki-páraok yink mwanap te fwap pwi námpon.

<sup>15</sup> Aeno asao i konám niamp ninik fek kápae kare kokopor i konap arop fákáre, foupou i konap arop fákáre, tá kokopor ninik i konap arop fákáre, tá arop tirá wour i konap arop fákáre, tá kwekár kwarén lotu i konap arop fákáre, tá arop ponankor kwekár ninikan warákárrá mántwaok i konap, am arop fárákap te Kwaromp taun mek tukup mo, ek yakáp mwanapon.

<sup>16</sup> Ono Jisas onomp ensel yumonapok sámp-kérép nanko pikia mao yumo sios fákáreran am kar farákáp námpon. Ono támao Devitomp yao arák fek taoi nampono. Tá ono maomp fi mekamp tárápono. Tá am térme Wap Kumur aokrá wae tákap konám te ono támaono.”

<sup>17</sup> Yiki Kor Spirit ntia Sipsip Morokamp yupu am anánkaopwerao sérrá, “Amo koropae!” Tá arop am kar wanám arop mao kor ankár sérrá, “Amo koropae!” Tá arop éntantá nikip nám kwamp te ankár koropano. Arop ént fánaeria nám kwamp te, ankár koropea Kwaro kwaporok sánk konám yiki yak sánknám ént am sámpano.

*Jono máma buk fekamp kar wanap aropan kárákáre fek sénám kar*

<sup>18</sup> Am profet kar máma buk fek yak nám wanap arop ponankoran ono Jono kar kárákáre fek sénampon: Táte arop ankwap am fek ankwap kar ke paprá sérianám te, kápae kare kwatae niniki nám fek méntér tapokwapea máma buk fek

sénámp ankank kwatae tárapokwampia am maomp pourouk akwap naerámpon. ☆

<sup>19</sup> Táte arop ankwap mǎmá buk fek yaknámp Kwaromp kar ankwapmwaek tirá épéri námp te, maomp yiki yak sámp naenámp yao ki te Kwaro sámp-sinaerámpon. Tá mao te am Yiki Kor Taun mǎmá bukao sénámp mek te youmpá yak naenámp pourou mono.

<sup>20</sup> Am arop kǎpae kare ankank ponankor korop naenámp farákáprá sénámp arop támao oukoumwan sérrá, “Kare karonó. Ono koupour kar korop nanae.”

“Yé! Jisas Tokwae Kar, amo koropae!” ☆

<sup>21</sup> Ono ninik namp te, Jisas Tokwae Karao námokuráp ninik fek yumwan yaewourria ponankor yumont yakanoria nampon. Am te kare takano.



**Kwaromp Kwapwe Kare Kar**  
**The New Testament in the Karkar-Yuri Language of**  
**Papua New Guinea**  
**Nupela Testamen long tokples Karkar-Yuri long**  
**Niugini**

Copyright © 1994 Wycliffe Bible Translators, Inc.

Language: Karkar-Yuri

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-01-09

---

PDF generated using Haiola and XeLaTeX on 18 Apr 2025 from source files dated 31 Aug 2023

7103f8db-88c2-5fec-8ac4-0edfac04e885